


LUKUMU YA BANA ¹

 . . . ya ke salaka munu mbote na kuwa yawu, ya ke mbote. Mbote, ya ke vwandaka ntangu nionso, mutindu mu tubaka ntete, “Mu ke vwandaka na kiese ntangu ba ke tubaka na munu, ‘Beto kwenda na yinzo ya Mfumu.” Mu banza ti David tubaka mutindu yina kilumbu mosi, “Beto kwenda na yinzo ya Mfumu.” Mu zaba ve kisika ya kulutila mbote kuvwanda, beno mpe, kulutila na kuvwanda na yinzo ya Mfumu.

² Ntangu yayi, na nkokila yayi, beto ke na mwa bankundi awa yina me katuka ntama kuna na Georgie. Mu banza ti ba ke kunata matoma na manima—na manima ya kudya na nkokila yayi. Na yawu beto ke . . . Ndambu na kati ya bawu me katuka ntama mingi, mu banza ti beno ke bikala awa. Mpe bivinga nionso yina kele ya beto kele ya beno.

³ Na yawu na Kilumbu ya tatu na nkokila beto ke landila, na kulonguka, na manima, kana Mfumu kuzola, na Lumingu ke kwisa diaka.

⁴ Mpe kuna na Chautauqua ya ke banda na kilumbu ya sambanu. Na yawu beno nionso yina me kubika bakonze, beto ke na kuingila ntangu mosi ya nene, ya kitoko na Chautauqua. Ya kele kisika beto ke kuzwaka ntangu mosi ya mbote ntangu nionso. Ya ke vwandaka na nkonga ya bantu mingi ve, beto ke vwandaka ntangu yankaka . . . Ya ke na bisika pene-pene . . . Mu banza ti beto lenda tula bantu mafunda kumi na kati, kukondwa mpasi. Kasi, mbala na mbala, mu banza na mvula me luta beto vwandaka na bantu pene ya mafunda sambwadi, kima mosi ya mutindu yina. Ya vwandaka na bantu mingi, kasi ya vwandaka na bisika mingi ya kutelama. Mpe bisika yina ba lendaka tula bakiti bisika nionso tii kuna na nsuka. Mpe na yawu beto ke na kuingila yawu.

⁵ Mpe mu ke na kiese na kumona na kati awa mingi ya bampangi ya beto ya balongi. Mu lenda ata fioti ve kubanza nkumbu ya yandi awa, missionary, Mpangi Humes na Mpangikento Humes, ya kele nge yina me vwanda awa, na bana, beto ke na kiese na kuvwanda na bawu, missionary mosi. Bayankaka, Mpangi Pat, Mpangi Daulton, mpe, oh, ba kele kaka mingi, Mpangi Beeler. Mpe mu me mona Mpangi Collins na mwa ntangu fioti me luta. Mpe, oh, ya ke vwanda mpasi mingi na kubokila bawu nionso. Kasi beto ke na kiese mingi na kuvwanda na beno na yinzo ya Mfumu na nkokila yayi. Mpangi yayi ya nene ya ntalu Neville kele ya kuvwanda awa na manima ya munu samu na kusambila na munu na ntangu beto ke longa Ndinga. Charlie, mu ke na kiese na kumona nge na Mpangikento Nellie awa na nkokila yayi, na bana. Yayi kele . . . mpe

kulonga Biblia ke vwandaka ntangu nionso ya kulutila . . . Yinga, Mpangi Welch, mu ke kaka . . . vwandaka sosa nge, mu me mona nge ya kuvwanda kuna na manima ntangu yayi.

⁶ Kulonga Biblia ke vwandaka mbala mingi mwa diambu ya boma, ya kele mwa, beno zaba, mutindu kutambula na zulu ya kima yina ke sielumukaka, mutindu beto ke bokilaka yawu. Kasi beto ke kuwa mutindu yina mbala yankaka, na kisika yayi mpe na ntangu yayi beto me kuma, ya lenda vwananda mbote na kunata dibuundu na yina mu banza, na lubakusu ya muvimba, samu na kisika, yina beto kele kati na Klisto Yesu. Mpe na bantangu yankaka mu ke banzaka ti malongi kele kima mosi ya kitoko, kasi mu ke kwikilaka na bantangu yankaka, Mpangi Beeler, ti malongi ke kwendaka ntama mingi na yawu, ya ke fioti . . . mingi-mingi samu na dibuundu.

Ntangu yayi, kulonga mbala na mbala ke kangaka nsumuki, ya ke nata yandi na nsi ya lufundusu na nzila ya Ndinga. Kasi malongi ke tulaka muntu kisika yina yandi kele. Mpe beto lenda ata fioti ve na mutindu ya kusungama kuvwanda na kiyeka ya kuvwanda na lukwikilu tii kuna beto ke zaba yina beto kele.

⁷ Ntangu yayi, kana Etats-Unis, ya yinsi yayi ya kitoko awa, kutinda munu kuna na Russie, mutindu ntumwa ya yinsi yayi, na Russie, na yawu kana ba me tinda munu landila misiku kuna na Russie, ngolo yina nionso Etats-Unis ke vwandaka na yawu kele na manima ya munu. Ndinga ya munu kele kaka mutindu mosi na yina ya Etats-Unis kana ba me zaba munu mutindu ntumwa mosi.

⁸ Na yawu kana Nzambi me tinda beto samu na kuvwanda bantumwa ya Yandi, ngolo yina nionso kele na Zulu, nionso yina Nzambi kele, Bawanzio ya Yandi nionso mpe ngolo ya Yandi nionso ke siamisamba mambu ya beto kana beto kele kieleka minatinsangu yina ba me tumisa, yina ba me tinda na bantu. Nzambi fwana zitisa Ndinga yango, samu ti Yandi sonikaka pwelele, ti “Yina nionso beno ke kanga na zulu ya ntoto, Mu ke kanga yawu na Mazulu. Yina nionso beno ke fungula na zulu ya ntoto, Mu ke fungula yawu na Mazulu. Mpe Mu me pesa beno bafungula ya Kimfumu.” Oh, bansilulu ya kitoko mutindu yina Yandi me pesa na dibuundu!

⁹ Mpe mu kele, na manima ya kilumbu yina . . . Mingi kati ya beno, mu banza, vwandaka awa na suka yayi samu na kuwa mutindu mu ke mekaka, na mutindu ya munu ya kukikulumusana, na malembe, na kutendula vision yina mu monaka na Mazulu.

¹⁰ Mu ke zola ata fioti ve kutula ntembe na konso diambu yina muntu mosi ke tuba na munu ti Nzambi me tuba na bawu. Mu ke kwikila yawu kaka ata kana mu me mona yawu ve na kati ya Masonuku, mu ke zola kukwikila kaka na ndinga ya mpangi-bakala yina. Mu—mu lenda kaka kukangama na Biblia, kasi mu ke kwikila ti mbala yankaka mpangi-bakala bakulaka yawu

kaka mbote ve, ti yandi monaka yawu mwa mutindu ya mbote ve. Mpe mu ke kwikila kaka ti yandi—yandi kele mpangi ya munu ya bakala.

¹¹ Mpe kana ya ke na kima mosi yina ke pela na kati ya ntima ya munu, mpe mu banza ti ya ke katuka ata fioti ve na bamvula ke kwisa, ti mu ke zimbana ata fioti ve diambu yina salamaka na Lumingu me luta na suka, lumingu me lunga. Ya salaka kima mosi na munu yina sobaka tsyelika luzingu ya munu. Mu—mu ke na boma ve. Mu—mu ke na boma ya lufwa ve. Lufwa ke talisa boma ata fioti ve. Mpe ya—ya ke sala kima mosi ve na beno kana beno me bakula. Ntangu yayi, mbala yankaka kana. . . Beno fwana vwanda na kimbangi samu na kuzaba yawu, samu ti ya kele na mutindu ve samu na kutendula yawu. Beno lenda kuzwa bampova ve, samu ya kele ve na kati ya buku ya bampova ya Kingelesi, to buku yankaka ya bampova, samu ti ya kele na kati ya Seko; mazono ve, mbasi ve, nionso ke na ntangu yayi. Mpe ya kele ve “Mu ke na kutalaka mbote,” mpe na manima ya ngunga mosi, “Mu kele mbote ve,” mpe na ngunga yankaka, “mu kele mbote diaka.” Ya ke kaka na ntangu yayi na ntangu nionso. Beno me mona? Ya ke na nsuka ata fioti ve, kaka ngemba yina ya nkembo, mpe kima mosi.

¹² Mpe ya lenda vwanda na disumu ve, ya lenda vwanda na kimpala ve, ya lenda vwanda na kimbevo ve, ya—ya lenda vwanda na kima mosi ve yina ke simba simu yina ya Mazulu. Mpe kana mu lenda vwanda na muswa ya kutuba yayi, na yina, mbala yankaka mu lenda ve. Kana mu lenda ve, na yawu mu ke sambila Nzambi na kulemvokila munu. Kasi kana mu ke na muswa, mpe ya vwandaka Nzambi yina salaka ti mu mata na kisika mosi samu na kumona kima mosi, mu ke bokila kisika yina mutindu Mazulu ya ntete. Na yawu mu banza, muntu mosi na kati ya Biblia, na nkumbu ya, mu banza ya vwandaka Paul, yina mataka na Mazulu ya tatu. Mpe kana ya vwandaka ya nkembo na Mazulu ya ntete, yinki ke vwanda na Mazulu yina ya tatu? Kuyituka ve ti ya lendaka zonzila yawu ve na bamvula kumi na yiya! Yandi tubaka ti yandi zabaka ve kana yandi vwandaka na nzutu ya yandi to na nganda ya nzutu ya yandi. Na ntumwa yina ya nene, ya kele ve samu na kukabisa kusalu ya yandi—ya yandi—ya yandi, to ya kele ve samu beto meka na kuvwanda kima ya mutindu mosi na yina yandi vwandaka, kasi mu lenda tuba na yandi, mu zaba ve kana mu vwandaka na nzutu ya munu to na nganda ya nzutu ya munu. Kima mosi kaka mu lenda tuba, ya vwandaka kaka kieleka mutindu mu ke na kutala beno.

¹³ Mpe mu ke kukiyufulaka ntangu nionso kana mu ke luta kuna mpe mu ke mona mwa dituti mosi tepa-tepa kuna, mpeve mosi, mpe mu ke tuba, “Yina mpangi-bakala mpe mpangi-kento, yina Charlie na Nellie. Yina Mpangi-bakala na Mpangi-kento Spencer ke na kukwenda kuna.” Ya ke yangisaka munu mingi ntangu nionso. Kana meso ya munu ke na kati ya ntoni, ke na

kubeba malembe-malembe, ke na kupola, kana makutu ya munu ke na kuwa diaka ve, mpe kana menga ya munu nionso me mana mpe ba me yumisa yawu, mpe ya ke na kati ya bamasa to na kati ya ntoto, mpe balenda ya munu ya kubanza, ba-cellule ya yintu ya munu nionso me kwenda, na yawu yinki mutindu mu ke vwanda kima yankaka ti mpeve mosi ke na kutepa-tepa? Mpe ya vwandaka yangisa munu. Mu ke zola kutuba, “Mbote, Mpangi Pat, oh, mu ke zola mingi kumona nge! Mbote, Mpangi ya bakala Neville, mu ke zola mingi kumona nge!” Kasi mu banzaka, “Mbote, kana mu ke na kima ve samu na kumona, mu ke na yinwa ve samu na kutuba, ya me pola, ya me kuma putulu, yinki mutindu mu ke vwanda na kiyeka ya kutuba, ‘Mbote, Mpangi Pat,’ ‘Mbote, Mpangi Neville,’ to nionso yina, ‘Mbote, Charlie?’”

¹⁴ Kasi ntangu yayi mu me zaba ti ya ke kifu. Samu ya me sonamaka na kati ya Masonuku, yina mu me tuba me swaswana ve, “Na yina kana tabernacle yayi ya ntoto me beba, beto ke dezia na mosi ke na kuvingila beto,” tabernacle yankaka yina ke na meso, makutu, bikoba, balenda ya kubanza. “Kana tabernacle yayi ya ntoto me beba!” Ya ke na nzutu wapi mu lenda simba, mu lenda tuba.

¹⁵ Mpe ntangu yayi ya me kwisa na munu, kaka na ntangu yayi, ti Moise kufwaka mpe yandi vwandaka na ntoni yina zabanaka ve bamvula nkama nana, mpe Elie kwendaka na Mazulu bamvula nkama tanu na ntwala, kasi na zulu ya Mongo ya Nsobolo ba monaka bawu kusolula na Yesu.

¹⁶ Na manima Samuel kufwaka pene ya bamvula tatu na tanu, mpe ndoki ya kento En-dor bokilaka yandi kuna, mpe yandi kubwaka kizizi na ntoto, mpe yandi tubaka, “Nge me vuna munu, samu nge kele Saul, nge mosi.” Yandi tubaka, “Samu mu me mona banzambi!” Yandi vwandaka mumpani, beno me mona. “Mu me mona banzambi ke na kumata.”

¹⁷ Mpe Saul monaka yandi ntete ve, mpe yandi tubaka, “Ya me fwanana na yinki? Tendula yandi na munu.”

Yandi tubaka, “Yandi ke na nzutu ya fioti, mpe yandi me lwata kazaka na zulu ya mapeka ya yandi.”

¹⁸ Yandi tubaka, “Yina Samuel, profete, nata yandi awa na ntwala ya munu.” Mpe mu zola bene kubakula ti Samuel kuzimbisaka ve bumuntu ya yandi. Yandi vwandaka kaka profete. Yandi tubaka na Saul kieleka yina ke salama mbasi.

¹⁹ Na yawu, beno me mona, lufwa ke zimbisa beto kimakulu ve mutindu beto ke dilaka mpe beto ke bokaka mpe beto ke niongaka na ntoni. Ya ke sobaka kaka kisika ya beto ya kuzinga. Ya ke katulaka beto kisika mosi na . . . Yinki bamvula kele? Kana mu ke zinga diaka ngunga mosi, mu zolaka zinga mingi kulutula bantu ya bamvula kumi na sambanu, mu zolaka zinga mingi kulutula bantu ya bamvula tanu. Bamvula ke kima mosi ve. Beto kele awa samu na kikuma, samu na kusala kima mosi.

20 Mbote, ntangu yayi, mingi ya mwa bamama yayi na kizizi ya kitoko yina me vwanda awa, bayankaka na kati ya bawu ke na bamvula makumi sambwadi, lendaka tuba, “Mbote, yinki mu me sala, Mpangi Branham?” Beno me sansa bana ya beno. Beno me sala yina beno lendaka sala.

21 Mbala yankaka tata mosi ya kiboba yina me vwanda awa, ke tuba, “Mbote, mu me bundula bilanga, mu me sala *yayi*. Mu me longaka ata fioti ve.” Kasi nge me sala kaka yina Nzambi tindaka nge na kusala. Ya kele na kisika samu na nge.

22 Mu vwandaka tuba na dokotolo mosi ya kiboba, mazono, mosi ya bankundi ya munu ya dokotolo, bankundi ya munu, ya bamvula makumi nana na ndambu. Mpe semeki ya yandi kele awa na yinzo-Nzambi na nkokila yayi, mpe yandi vwandaka kukiyangisa fioti, ya vwandaka kukiyangisa fioti samu na yandi. Mpe mu kwendaka tala yandi. Mpe kaka na ntangu mu bandaka na kusolula na yandi, kizizi ya yandi kusemaka, yandi bandaka na kutuba na munu samu na yina me tala nzietelo ya kuzomba yandi salaka na bamvula mingi me luta kuna na Colorado, kaka na yinsi yina mu ke zombaka. Yandi vwandaka diaka na ngolo mpe kikesa! Mpe mu tubaka, “Dokotolo, kubanda yinki ntangu nge ke salaka kisalu yango?”

23 Yandi tubaka, “Ntangu nge vwandaka kunwa mabele.” Mpe na kati ya ntima mu tubaka. . . “Mpe na bantangu mingi,” yandi tubaka, “Mu vwandaka sala kisalu yango, mu vwandaka baka pusu ya munu, mu vwandaka tula saki ya kiti na mpunda ya munu. Mu vwandaka baka mwa sakosi ya munu mpe mu vwandaka tambula.”

24 Mpe mu tubaka, “Yinga, mu vwandaka luta na lweka ya mwa bamasa, na ngunga ya zole na suka, na mwinda ya beno ya pokosi, beno ke meka na kuzwa yinzo yina sika wapi mwana mosi ya fioti vwandaka na mpasi ya kivumu to mama mosi na mpasi ya kubuta.”

“Yina kele kieleka.”

25 Mpe mu tubaka, “Nge zaba, dokotolo, mu banza, na simu yina ya ndilu yayi awa, na kati ya lufwa na luzingu ya kukonda nsuka, Nzambi ke na kisika samu na badokotolo ya mbote ya biboba yina ke salaka kisalu ya bawu mutindu yina.”

26 Masa ya meso ya nene fulukaka na meso ya yandi mpe yandi bandaka na kudila, yandi simbaka munu na maboko ya yandi ya kulemba mpe yandi tubaka, “Mpangi-bakala, mu ke banzaka mutindu yina.” Na simu yina, Nzambi ke sambisaka moyo ya muntu, yina yandi kele.

27 Na yawu mu pesaka yandi Masonuku yayi ya lusiamusu. Na bantangu mingi, yandi vwandaka panza nzila na mpasi na kati ya bilanga ya mudidi ya bapoto-poto na nkokila, samu na kumeka na kusadisa muntu mosi, ntangu yankaka kukondwa kuzwa ata palata ve samu na yawu, kasi ya kele mbote mingi.

Mu tubaka, “Yesu tubaka na kati ya Masonuku, ‘Kiese na bantu ya mawa, samu ba ke kuzwa mawa.’” Mpe yina ke kieleka.

²⁸ Mpe na nkokila yayi beto zola tula dibuundu, na kati ya malongi yayi tatu, kana Nzambi kuzola, wapi mutindu mpe yinki ya kutala, yina beto kele. Beto ke banda na kapu ya 1 ya Buku ya mukanda ya Paul na Ephèse. Mpe beto ke baka makapu tatu ya ntete na kati ya baleso ya beto na ntwala, beto ke meka na kubaka kapu mosi na konso nkokila, kana beto ke kuka. Na nkokila yayi, na Kilumbu ya tatu, mpe na suka ya Lumingu ke kwisa. Éphésiens, kapu ya 1. Ntangu yayi mutindu beto ke na kulonguka kintwadi, mu zola kutuba mutindu yayi, ti Buku yayi ya Éphésiens me fwanana na mutindu ya kulunga na Ngwisani ya Ntama ya Josué. Ba-Éphésiens, Buku ya Éphésiens.

²⁹ Ntangu yayi, beno bambuka moyo, kana yawu salama mwa fioti ti beto wisana ve, na malongi ya beno, beno lemvočila beto kaka mpe beno kangila beto ntima fioti. Na ntwala beto zibula yawu, beto lomba Yandi na kusadisa beto, na ntangu beto ke kulumusa bayintu ya beto.

³⁰ Mfumu, beto ke na pusana na Masonuku ya santu mpe ya bunzambi, na yina Yawu ke na ngolo mingi kulutula mazulu na ntoto ya muvimba. Samu beto ke tangaka na Ndinga yayi, yina ba me bokila Biblia, ti “Nionso zole zulu na ntoto ke luta, kasi Ndinga ya Nge ke kondwa ata fioti ve.” Na yawu, na ngunga yayi ya mfunu mingi mu me kwisa na chaire yayi na nkokila yayi, na ntwala ya bayina me kuzwama na Menga ya Nge, bantu yayi ya ntalu mpe yina ke kufwa me vwanda awa na nkokila yayi, samu na kusimba mwa kivuvu yina bawu lenda, samu na kukangama na Nsemo yina ke kwisa. Bika ti yawu kuvwanda ya kulunga, na nkokila yayi, ti konso mukwikidi awa ke mona kisika ya yandi, mpe muntu yina nionso me kwisaka ntete ve na ngwisani yayi ya nene, ke sala kingolo-ngolo na kukota na Kimfumu, Mfumu, mpe yandi ke bula na mwelo tii kuna Mukengi ke zibula mwelo. Pesa yawu, Mfumu.

³¹ Beto ke tangaka awa ti Biblia yayi kele na nsatu ya ntendulu ya muntu mosi ve. Nzambi, pesaka muswa ve ti munu kisadi ya Nge to muntu yankaka kumeka na kutula ntendulu ya bawu mosi na Ndinga. Ti beto kutanga Yawu kaka mpe beto kwikila Yawu, mutindi ba me sonika Yawu. Mpe mingi-mingi beto bamvungi ya kimvuka ya mameme, beto ba-pasteur yina ke vukana kintwadi na simu yina na Ntoto yina ya nkembo na mwa kimvuka ya mameme, mpe beto ke telama na Ntwala ya Mfumu Yesu mpe beto ke mona ndonga ya bantu yina ke monika, ya Paul, na ya Pierre, na ya Luc, na Marc, na Matthieu, mpe bawu nionso, mpe beto ke mona bawu mutindu ba ke sambisa bawu na bimvuka ya bawu. Nzambi, sala ti mu tulula ba-million kumi ya ba-trophée na makulu ya Nge na ntangu mu ke tambula ya kufukama na kukikulumusa nionso na zulu ya makulu ya Nge ya ntalu, mpe mu ke tuba, “Mfumu, bawu kele ya Nge.”

³² O Nzambi, fulusa beto na Mpeve ya Nge ya madidi, mpe na zola ya Nge mpe mambote ya Nge. Mpe ti beto, mutindu muyimbi tubaka na nkunga bamvula mingi me luta, “Mwana-dimeme ya tondama yina kufwaka, Menga ya Nge ya ntalu ke zimbisa ngolo ya yawu ata fioti ve, tii kuna Dibuundu ya Nzambi ya muvimba yina me sumbama ke vuluka samu na kusumuka diaka ve. Mpe kubanda, na nzila ya lukwikilu, mu me monaka kiziba yina mputa ya Nge ya kuzibuka kuzwaka samu na munu; zola yina sumbaka munu me kumaka nkunga, mpe ya ke vwanda kaka tii na lufwa ya munu. Na yawu na nkunga ya lukumu mingi, mpe ya lembami mingi,” yandi landilaka na kutubaka, “Mu ke yimbila ngolo ya Nge ya mpulusu; ntangu kuniunguka ya mwa bikobo yayi, ya kupitakana ke kangama na kati ya ntoni.” Na yawu, ntoni ke kangaka bana ya nge na lufwa ve. Yawu kele kaka kisika ya kupema, to kisika ya kubumbama, kisika nzutu yayi ke kupola ke lwata nzutu yina ke polaka ve.

³³ Bika ti beto mona yawu na nkokila yayi, Mfumu, na pwelele, mutindu ya me pesama na beto na kati ya Ndinga. Pesa beto lubakusu. Mpe tula beto, Mfumu, na kisika ya beto ya kisalu, samu beto sala kisalu mbote-mbote tii kuna Nge ke kwisa. Beto ke lomba yawu na Nkumbu ya Yesu, mpe samu na Yandi. Amen.

³⁴ Ntangu yayi, Buku ya Éphésiens, mutindu mu me tuba yawu, Munu . . . na dibanza ya munu, ya kele mosi ya Babuku ya kulutula nene ya Ngwisani ya Malu-malu. Ya ke nata beto, na ntangu Calvinisme me kwenda na lweka mosi, mpe Arminisme me kwenda na lweka yankaka, kasi Buku ya Éphésiens ke vukisa yawu kisika mosi mpe ke tula Dibuundu na kisika ya yawu.

³⁵ Ntangu yayi, mu fwanikisaka yawu na Josué. Kana beno me bakula, ba basisaka Israel na Egypte, mpe ya ke na bitezo tatu ya nzietelo ya bawu. Kitezo ya ntete, vwandaka kukatuka na Egypte. Kitezo yina landaka, vwandaka ntoto ya kuyuma. Mpe kitezo yina landaka, vwandaka Canaan.

³⁶ Ntangu yayi, Canaan ke talisaka ve mbandu yina ya Millenium. Ya ke talisaka kaka mbandu ya munungi, nsungi ya lunungi, samu ti na Canaan bawu vwandaka kufwa bantu mpe bawu vwandaka kuyoka mpe bawu vwandaka botula bambanza. Mpe lufwa ke vwanda ve na Millenium.

³⁷ Kasi kima yankaka yina yawu ke talisa, yawu ke nata lunungu na nzila ya lukwikilu, na manima ya bawu kwikilaka na Moise mpe bawu bikaka Egypte. Kusantisama, na ntangu bawu vwandaka tambula na nsi ya lutwadusu ya Dikunzi ya Tiya mpe lemvo ya masumu ya mwana-dimeme na ntoto ya kuyuma. Na manima bawu kotaka na ntoto yina ya nsilulu.

³⁸ Ntangu yayi, yinki kele ntoto ya nsilulu samu na mukwikidi ya Ngwisani ya Malu-malu? Nsilulu kele Mpeve-Santu. “Mpamba ve ya ke salama na bilumbu ya nsuka,” Joel 2:28, “ti Mu ke mwangisa Mpeve ya Munu na zulu ya bantu nionso. Bana

ya beno ya babakala na bana ya beno ya bakento ke pesa profesi. Mpe na zulu ya bisadi ya munu ya bakento mpe bisadi ya Munu ya bakento Mu ke mwangisa Mpeve ya Munu, mpe bawu ke pesa profesi. Mu ke talisa mambu ya ngitukulu kuna na mazulu. Mpe na ntoto, makunzi ya tiya, mpe midinga, na mupepe ya tiya.” Mpe Pierre tubaka, na Kilumbu ya Pantekote, na manima ya yandi kubakaka mukanda ya yandi mpe yandi longaka, “Beni balula bantima, beno nionso, mpe beno baka mbotika na Nkumbu ya Yesu Klisto samu na kukatula masumu,” samu na kukatula, samu na mulemvo, samu na kukatula masumu ya beno me lutaka.

³⁹ Beni me bakulaka, Josué, na ntwala bawu kuzabuka Jourdain, Josué tubaka, “Beni kwenda na kati ya camp mpe beno sukula bilele ya beno mpe beno kukisantisa beno nionso, mpe muntu mosi ve kupusana pene-pene ya kento ya yandi, samu na bilumbu tatu beno ke mona nkembo ya Nzambi.” Beni me mona? Ya ke—ya kele kitezo ya kukubama samu na kubaka nsilulu. Ntangu yayi, nsilulu samu na Israel, vwandaka, Nzambi pesaka Abraham nsilulu ya ntoto yango, ya Palestine, mpe ya zolaka vvwanda ya bawu kukondwa nsuka. Mpe ya lombaka ti bawu bikala ntangu nionso na ntoto yayi.

⁴⁰ Ntangu yayi, bawu lutaka bitezo tatu, samu na kukuma na ntoto yayi ya nsilulu. Beni tala ntangu yayi, ya me fwanana kieleka na Ngwisani ya Malu-malu.

⁴¹ Mpamba ve yayi, mutindu mu me tuba yawu, ya ke wisana ve na mwa mabanza ya beno. Bayankaka kati ya beno bantu ya ntalu ya ba-Nazaréen, Dibuuundu ya Nzambi, mpe nionso yina, yawu kupesa beno mpasi ve, kasi beno tala yawu mbote-mbote mpe beno tala bifwanusu. Beni tala mbote mpe beno ke mona ti ya ke fwanana na mutindu ya kulunga.

⁴² Ya vvwanda na bitezo tatu ya nzietelo, mpe ya ke na bitezo tatu ya nzietelo yayi. Na yina, beto nungisama na nzila ya lukwikilu, na kukwikilaka na Mfumu Yesu Klisto, beto ke katuka na ntoto ya Egipte, beto ke basika. Na manima beno me santisama na nzila ya dikabu ya Menga ya Yandi, beto me sukulama na masumu ya beto, mpe beto me kuma bizieti mpe banzenza, beto ke na kutuba ti beto ke na kusosa ntoto mosi, mbanza yina na kwisa, to nsilulu mosi.

⁴³ Israel salaka mutindu yina na ntoto ya kuyuma, banzenza, bawu vvwanda na kisika ya kupema ve, bawu vvwanda zieta mpimpa na manima ya mpimpa, bawu vvwanda landa Dikunzi ya Tiya, kasi nsuka-nsuka bawu kumaka na ntoto ya nsilulu sika wapi bawu zingaka.

⁴⁴ Ya ke kisika yina mukwikidi ke kumaka. Yandi ke ndimaka ntete ti yandi kele nsumuki; na manima yandi me kabwana na nzila ya bamasa, kusukwama ya masa, na nzila ya Menga, mpe . . . to kusukwama ya masa na nzila ya Ndinga, to, kukwikila

na Mfumu Yesu klisto. Na yawu, na ntangu ya nungisama na nzila ya lukwikilu, yandi ke kuma mosi ya yawu, mpe yandi ke na ngemba na Nzambi, na nzila ya Klisto, yina me botama na Nkumbu ya Yesu Klisto, samu na kukotisa yandi na nzietelo. Beno me bakula yawu? Yandi me kota na nzietelo! Na yawu yandi ke kuma nzenza mpe muzieteti. Yandi ke na nzietelo ya yandi samu na kukwenda wapi? Nsilulu yina Nzambi pesaka.

⁴⁵ Israel vwandaka me yamba ntete nsilulu ve, kasi bawu vwandaka na nzietelo ya bawu. Mpe kukondwa kuzangula. . . Beno bakula munu mbote. Ya ke kisika yina beno, ba-Nazaréen na Pélérin de la Saintéte, mpe nionso yina, me kubwa. Samu, Israel, ntangu bawu kumaka na kisika yayi, ya Kadès-Barnéa, ntangu balangididi kwendaka zikisa ntoto mpe tubaka, “Ntoto kele ya nene,” kasi bayankaka na kati ya bawu vutukaka mpe tubaka, “Beto lenda kubaka yawu ve, samu bambanza kele na bibaka ya ngolo, mpe nionso yina.” Kasi Josué na Caleb telemaka kuna, mpe tubaka, “Beto ke na lenda mingi samu na kubaka yawu!” Samu na bapapié ya bawu na banzonzolo ya bawu, bawu kwikilaka na bisalu yayi zole ya lemvo, kunungisama na kusantisama, mpe bawu lendaka kwenda ntama mingi ve. Mpe, beno kuwa, bantu yina nionso kufwaka na ntoto ya kuyuma. Kasi zole ya bayina kwendaka zikisa ntoto ya nsilulu mpe nataka nzikisa ti ya vwandaka ntoto mosi ya mbote, “mpe beto fwana kieleka kubaka yawu, samu ya vwandaka nsilulu ya Nzambi.” Na yawu na kisika bantu kukwenda na ntwala, samu na kuzwa Mpeve-Santu, kutuba bandinga ya malu-malu, kuzwa ngolo ya Nzambi, mbotika ya Mpeve-Santu, bidimbu, mambu ya ngitukulu, bimangu, bawu tubaka ti nionso yina ke buka binkulu ya malongi ya bawu. Mpe yinki salamaka? Bawu kufwaka na ntoto! Ya kieleka.

⁴⁶ Kasi mikwikidi, kimvuka ya Caleb na Josué, yina vwandaka landila na kukwenda na nsilulu, bawu landilaka nzila ya bawu tii na ntoto yango, bawu bakaka ntoto yango, mpe zingaka na ntoto yango, mutindu kima ya bawu. Mpe beto ke suka ata fioti ve na lunungu, kusantisama. Beto landila tii na mbotika ya Mpeve-Santu. Beto suka ve na kukwikila na Mfumu Yesu, kubaka mbotika. Beto suka ve samu Yandi sukulaka beto na luzingu ya masumu. Kasi ntangu yayi beto ke sala kingolo-ngolo samu na kisika mosi, na nsilulu ya mbotika ya Mpeve-Santu. Na yina Pierre tubaka, na Kilumbu ya Pantekote, “Na yina nsilulu kele samu na beno, mpe samu na bana ya beno, mpe bayina nionso ke ntama, ya mingi Mfumu Nzambi ya beto ke bokila.”

⁴⁷ Na yawu, na Éphèse awa ba me tula beto mutindu Josué, na kisika. Beno tala, Josué, na manima ya kuzabuka ntoto, mpe kubaka ntoto, na manima yandi kabulaka ntoto. “Ephraïm *awa*, Manassé *awa*, mpe yayi *awa*, Gad *awa*, Benjamin *awa*.” Yandi kabulaka ntoto.

⁴⁸ Mpe beno tala! Oh, yayi ke kima mosi ke yangidika bantima

ya beto! Mosi na mosi ya bamama yina ya ba-Hebreux, ntangu ba vwandaka kubuta bana yina, yandi tubaka kisika yina, ntangu ya vwandaka na bampasi ya yandi ya kubuta, kisika ba ke vwanda na ntoto ya nsilulu. Oh, ya ke dilongi mosi ya nene! Kana beto lendaka baka yawu kaka na fyoti-fyoti, yina ke baka bangunga na bangunga. Kilumbu mosi ntangu beto ke yidika yinzo-Nzambi ya beto, mu ke kwisa mpe mu ke lutisa ngonda ya muvimba to zole, samu na kutubila yawu kaka. Beno tala ntangu bawu, mosi na mosi ya bamama yina, ntangu yandi bokilaka, “Ephraim,” ntangu yandi vwandaka na misongo, yandi pesaka yandi kisika ya yandi kisika yina makulu ya yandi vwandaka na kati ya mafuta. Kisika yango kieleka samu na mosi na mosi ya bawu na kisika ya bawu!

⁴⁹ Mpe Josué, kukondwa kuzaba yayi, kasi na lutwadusu ya kimpeve, twadisamaka na Mpeve-Santu, na manima kukota na ntoto ya nsilulu, yandi pesaka konso muntu nsilulu ya yandi, kaka mutindu Mpeve-Santu silaka na lubutuku ya bawu kuna.

⁵⁰ Ya ke mutindu yina Nzambi me tulaka bantu yankaka na kati ya dibuundu, na nzila ya bampasi ya kubutuka! Oh, na bantangu yankaka ya ke monana nene mingi. Ntangu dibuundu ke na kunionga na nsi ya bampasi ya yinza ya nganda, yandi ke kwikila na Mfumu Yesu, ti nsilulu yango ya Mpeve-Santu kele kaka ya kieleka samu na beto mutindu ya vwandaka na Pantekote, na kunionga mpe kuboka na ntangu ya bampasi ya kubuta! Kasi ntangu bawu me butuka, mpe bawu me baka kisika ya lubutuku ya bawu na Kimfumu ya Nzambi, na yawu Mpeve-Santu me tula na kati ya dibuundu, bayankaka bantumwa, bayankaka baprofete, bayankaka balongi, bayankaka bapasteur, bayankaka ba-evangeliste. Na yawu Yandi me tula kuna na kati, kutuba na bandinga ya malu-malu, ntendulu ya bandinga, luzabu, ndwenga, makabu ya kubeluka ya nzutu, bimangu ya mutindu na mutindu.

⁵¹ Kisika dibuundu kele . . . Ntangu ya ke samu na yina mu ke na kusalaka yayi. Dibuundu ke na kumeka na kubaka nsongi ya muntu yankaka. Kasi beno sala mutindu yina ve. Beno lenda ata fioti ve kukuna blé na nsongi ya Ephraim, kana nge kele Manassé. Beno fwana baka kaka kisika ya beno kati na Klisto, beno baka yawu kulandila kisika ya beno. Oh, ya ke kuma mudindu mpe ya bumvwama ntangu beto ke tubila mambu yayi, mutindu Nzambi ke tulaka muntu mosi na kati ya dibuundu samu na kutuba na bandinga ya malu-malu, yankaka . . . Ntangu yayi, ba me tubaka na beto bambala mingi ti, “beto nionso fwana kutuba na bandinga ya malu-malu.” Yina kele luvunu. “Beto nionso fwana sala yawu.” Ve, beno ke sala yawu ve. Bawu nionso vwandaka sala kima mosi ve. Mosi na mosi vwandaka . . .

⁵² Mosi na mosi, ba pesaka yinsi mpe ba kabulaka yawu na lutwadusu ya kimpeve. Mpe, mosi na mosi, mu lenda baka Masonuku mpe kotalisa yawu na beno kaka, ti yandi tulaka

bawu na kisika yina bawu lendaka vwanda, na kisika ya bawu, mutindu kati-kati ya makanda yina zole lendaka vwanda na simu ya nzadi, mutindu bamama ya bawu bokaka na lubutuku ya bawu, mpe mutindu konso kisika lendaka vwanda.

⁵³ Mpe ntangu yayi na manima beno me kota na kati, yina zola tuba ve ti beno ke nwana diaka mvita ve. Beno fwana nwana kaka samu na konso kitini ya ntoto. Na yawu, beno me mona, Canaan vwandaka talisa ve Zulu ya nkembo, samu ya ke mvita mpe bampasi mpe kufwa bantu mpe kunwana, mpe nionso yina. Kasi yawu vwandaka talisa yayi, ti ya fwana vwanda na ndiatulu mosi ya kulunga.

⁵⁴ Ya ke kisika yina dibuundu me kubwa bubu yayi, na ndiatulu yina. Beno zaba ti ata mpe kikalulu ya beno lenda sala ti muntu yankaka kubeluka ve? Bikalalulu ya beno ya yimbi, masumu ya beno ya kukondwa kufungula beno mikwikidi, lenda sala ti dibuundu yayi kubwa kimakulu. Mpe na Kilumbu ya Lusambusu beno ke pesa mvutu samu na nionso yina. “Oh,” beno ke tuba, “ntangu yayi, vingila fioti, Mpangi Branham.” Mbote, yina ke Kieleka. Beno banza na yawu!

⁵⁵ Josué, na manima ya kuzabuka na yinsi yango, Nzambi pesaka yandi nsilulu ti. . .beno banza ntete, yandi nwanaka bitumba nionso kukondwa kuzimbisa muntu mosi, kukondwa kuzwa ata kidimbu ya mputa ve, kukondwa kuvwanda na nsatu ya lifulume, to lusansu ya ntete to kusukula mputa. Amen. Nzambi tubaka, “Yinsi kele ya nge, kwenda nwana.” Beno banza, kunwana bitumba, mpe ya ke na Kulunsi ya Mbwaki ve na nziunga na mutindu nionso, ya ke na muntu ve ke lwala!

⁵⁶ Mpe bawu kufwaka ba-Amoréen na ba-Héthien, kasi muntu mosi ve kulwalaka na kati ya bawu tii kuna disumu kotaka na camp. Mpe ntangu Acan kubakaka kazaka ya Babylonien yina na kitini ya wolo yina, mpe yandi bumbaka yawu na tenta ya yandi, na yawu kilumbu yina landaka bawu zimbisaka bantu kumi na sambanu. Josué tubaka, “Beno telema! Beno telema! Beno vingila fioti, ya ke na kima mosi ke tambula mbote ve! Kima mosi ke tambula mbote ve awa. Beto ke manga madia bilumbu sambwadi. Nzambi pesaka beto nsilulu, ‘Kima mosi ve ke lwadisa beto.’ Bambeni ya beto ke kubwa na makulu ya beto. Mpe ya ke na kima mosi ke tambula mbote ve awa. Kima mosi me tambula mbote ve kisika mosi, samu beno ke na bamvumbi kumi na sambanu awa. Bawu kele bampangi ya babakala ya ba-Israelite, mpe bawu me kufwa.”

⁵⁷ Samu na yinki bawu me kufwa, bantu yina zaba diambu ve? Samu muntu mosi basikaka na ndonga. Beno me mona samu na yinki dilongi yayi ke na mfunu? Dibundu lendaka vwanda na ndonga, kuvwanda na ndonga na Ndinga ya Nzambi, kuvwanda na ndonga na Nzambi mpe kuvwanda na ndonga na mosi na yankaka, na kutambula na mutindu ya kusungama, na

mutindu ya mbote, na ntwala ya muntu nionso, na kubanga Nzambi. Samu ti muntu mosi kuyibaka kazaka mosi, mpe yandi salaka kima yina yandi lendaka sala ve, bantu kumi na sambanu kufwaka! Mu banza ya vwandaka kumi na sambanu, mbala yankaka kulutila mingi. Mu banza ti ya vwandaka kumi na sambanu yina kufwaka.

58 Josué bokilaka bawu, yandi tubaka, “Ya ke na kima mosi ke na kutambula mbote ve! Nzambi pesaka nsilulu, mpe kima mosi ke na kutambula mbote ve.”

59 Ntangu beto ke nataka bambevo na ntwala ya beto, mpe bawu me beluka ve, beto ke na nsatu ya kumanga madia ya nene, kubokila lukutakanu mosi. Kima mosi ke na kutambula mbote ve kisika mosi. Nzambi pesaka nsilulu, Nzambi fwana kangama na nsilulu yina, mpe Yandi ke sala yawu.

60 Mpe yandi bokilaka kumanga madia. Mpe bawu monaka ti, bawu bulaka zeke. Mpe Acan fungulaka yawu. Mpe bawu kufwaka Acan, dibuta ya yandi na bima nionso, mpe bawu yokaka mbombi ya bawu, mpe bawu bikaka bawu kuna mutindu monima mosi. Mpe Josué landilaka kaka na kunwana, yandi botulaka bima nionso, kukondwa kidimbu ya mputa to mputa mosi. Yawu yina.

61 Kilumbu mosi ya vwandaka na nsatu ya mwa ntangu fioti, mwa ntangu mingi. Mwini vwandaka pene-pene ya kudinda, bantu lendaka nwana mbote mingi ve na mpimpa. Josué, munwani yina ya nene, mupakulami ya Nzambi, ba tulaka yandi na kisika ya yandi na ntoto, mutindu ba-Ephésien na Dibuundu ya malu-malu, kuyala, yandi bakaka luyalu, na kubakaka luyalu ya yinsi, na kubakaka luyalu na zulu ya yawu. Yandi vwandaka na nsatu ya mwa ntangu, na yawu yandi tubaka, “Mwini, telema kuna!” Mpe yandi telemaka kuna bangunga pene ya kumi na zole, tii kuna yandi bakaka yinsi yango. Beno me mona?

62 Ntangu yayi Buku ya Éphésiens ke tula beto na kisika ya beto kati na Klisto, mutindu ba tulaka bawu na Yinsi ya Santu. Ba me tula beto na Yinsi ya Santu ve, kasi na Mpeve-Santu! Ntangu yayi beto tanga Ndinga, beto mona mutindu dibuundu kele ya kulunga:

Paul, ntumwa ya Yesu Klisto na luzolo ya Nzambi, . . .

63 Oh, mu ke zolaka yawu! Nzambi salaka yandi ntumwa. Bakuluntu kutetikaka maboko na zulu ya yandi ve, ba-évêque kutindaka yandi sika mosi ve, kasi Nzambi bokilaka yandi mpe salaka yandi ntumwa.

Paul, ntumwa ya Yesu Klisto na luzolo ya Nzambi, na basantu (bayina me santisama) yina kele na Ephèse, mpe na bayina kele ya kukwikama na Yesu Klisto:

64 Beno tala mutindu yandi ke na kutuba diambu yayi. Yayi kele samu na mimpani ve. Yayi kele samu na dibuundu. Ya me

tala bayina ba me bokila na kubasika, bayina me santisama mpe bayina ba me bokila na kubasika yina kele kati na Klisto Yesu.

⁶⁵ Ntangu yayi, kana beno zola zaba mutindu beto ke kotaka kati na Klisto Yesu, kana beno lenda baka Ntete ya Corinthiens kapu 12, ya me tuba, “Mpamba ve na Mpeve mosi beto nionso me botama kati na Nzutu mosi.” Wapi mutindu? Beto me botama na yinki? Mpeve-Santu. Na mbotika ya masa ve, beno bantu ya Dibuuundu ya Klisto, kasi na nzila ya M ya nene p-e-v-e mosi, na Mpeve mosi. Ya ke na kupesa mbote ve, na mukanda mosi, na kumwangisa masa na zulu ya yintu ve. Kasi, “Na Mpeve mosi beto nionso me botama kati na Nzutu mosi,” luyalu ya beto, Yinsi yina Nzambi pesaka beto samu na kuzinga, Mpeve-Santu. Kaka mutindu Yandi pesaka Canaan na ba-Juif, Yandi me pesa beto Mpeve-Santu. “Na Mpeve mosi beto nionso me botama kati na Nzutu mosi.” Beno me bakula yawu?

⁶⁶ Ntangu yayi, yandi ke na kutuba na ba-Canaanite ya kimpeve, Israel, Israel ya kimpeve yina me baka yinsi. Oh, beno ke na kiese ve samu beno me bika ayi ya Egypte? Beno ke na kiese ve samu beno me basika na ntoto ya kuyuma? Mpe, beno bambuka moyo, bawu kudiaka mana, madia ya Bambazi yina me katuka na Zulu, tii kuna bawu zabukaka na yinsi. Mpe na ntangu bawu kotaka na yinsi yango, mana bikisaka na kubwa. Bawu kumaka bantu ya kukula kuna, mpe bawu kudiaka blé ya ntama ya yinsi. Ntangu yayi, ntangu yayi ti beno kele diaka babébé ve, ntangu yayi ti beno kele diaka na nsatu ve ya miliki ya kuvedila ya Nsangu ya mbote, ti ba bondila beno ve, mpe ba leba beno ve, mpe kutindika beno na kukwenda na yinzo-Nzambi, ntangu yayi ti beno me kuma bantu ya kuyela Baklisto ya kieleka ya kukula, beno me kubama na kudia misuni ya ngolo ntangu yayi. “Beno me kubama na kukota na kima mosi,” yandi tubaka. Beno me kubama na kubakula kima mosi ya mudindu mpe ya bumvwama. Oh, beto ke kota na yawu mbala mosi. Mpe, oh, ya me bumbama kubanda mbandukulu ya yinza. Yandi tubaka, “Ntangu yayi beno me kota na yayi, mu ke na kutuba na beno yayi.” Ya kele ve samu na bayina me bikaka Egypte, samu na bayina kele kaka na nzietelo ve, kasi samu na bayina kele na yinsi ya nsilulu, bayina me kuyamba nsilulu.

⁶⁷ Bantu yikwa me kuyamba nsilulu ya Mpeve-Santu? Oh, beno ke na kiese ve ti beno ke na kati ya yinsi? Na lweka yayi awa ntangu yayi, beno ke na kudia blé yango, beno ke na kudia bima ya ngolo ya Nzambi mpe beno me kuzwa lubakusu ya kieleka. Mabanza ya beno—ya beno ya kimpeve me basika na mubulu nionso. Beno me zaba kieleka Nani Yandi kele. Beno zaba kieleka yina Yandi kele. Beno zaba kieleka kisika beno ke na kukwenda. Beno zaba kieleka nionso samu na Yawu. Beno zaba na Nani beno me kwikila mpe beno me ndima ti Yandi ke na kiyeka ya kukeba yina beno me pesa Yandi tii na kilumbu yina. Oh, beno tala muntu yango, yina Paul ke na kutubila na ntangu yayi. Beno

kuwa mbote. Beno tala ntangu yayi.

. . . na bantu ya kwikama kati na Klisto Yesu:

⁶⁸ Ntangu yayi, bika mu vutukisa yawu diaka na dibuundu. Yinki mutindu beto ke kotaka kati na Klisto? Na kukota na dibuundu? Ve. Na kutulaka bankumbu ya beto na buku? Ve. Na kubotamaka na kati ya masa? Ve. Wapii mutindu beto ke kotaka kati na Klisto? Na nzila ya Mpeve-Santu mosi beto me botama na nsilulu mosi, Nzutu, mpe beto me kuma bayina vwandaka me belama na bima yina nionso kele na kati ya yinsi. Amen! Oh, mu—mu ke zolaka yawu. Kana mungungu ya munu vwandaka ve ya kukangama, mu zolaka kuboka. Oh, la la, kana mu me kota na yinsi yango, ya kele ya munu. Mu ke na yinzo ya munu ntangu yayi; mu ke na Canaan. Mu me kubama samu na konso diambu yina Nzambi zola sala na nzila ya munu. Mu ke na kukwenda na ntoto ya santu, mwana ya Ntinu, yina me lwata kazaka mpe yina me kubama. Mu me basika na Égypte, mu me kuma na yinsi ya nsilulu, mu me nunga bakumekama, mu me zabuka Jourdain tii na nsilulu yayi ya lusakumunu. Oh, wapi mutindu mu me kuzwa yawu? Na Mpeve mosi. Mutindu mosi Paul kuzwaka Yawu, ya salaka mutindu mosi Yawu salaka na yandi, mutindu mosi Yawu salaka na beno. “Na Mpeve mosi beto me botama.” Ya ke kumwangisa masa ve, mwa matangá ya Yawu, ya ke sala mbote mingi; kasi kukota ya muvimba na masa! Beto nionso me kotaka ya muvimba na masa samu na kuzengisa, na kati ya Mpeve-Santu. Yawu yina nsilulu.

⁶⁹ Ba-Ephésien ya beto, Josué ya beto, yina kele Mpeve-Santu, *Josué* zola tuba “Yesu, Mvulusi.” Josué zola tuba Mpeve-Santu yina me talisama na kimpeve mutindu ya vwandaka na kimuntu, ti Yandi kele Munwani ya beto ya nene. Yandi kele Ntwadisi ya beto ya nene. Mutindu Nzambi vwandaka na Josué, mutindu mosi Nzambi (na Mpeve-Santu) ke na kutwadisa ndiatulu ya beto. Mpe ntangu disumu ke kota na camp, Mpeve-Santu ke lomba halte, “Yinki ke na kutambula mbote ve na kati ya dibuundu yayi? Kima mosi ke na kutambula mbote ve.” Oh, beno me mona ve ti beto ke na bana mingi ya Kis na ntangu yayi? Ba Saul mingi me katuka na baseminere mpe na balukolo ya théologie mpe bayina ke na kukwenda mpe ke na kulunga mambu yayi ya yimbi, mutindu Biblia me tuba ti ba ke sala. “Na kutala mbote, ba ke na Lukwikilu ve, ba ke kabwana na beno, ba ke vwanda na ngwisani mosi ve na beno, mpe nionso yina, ba ke na mutindu ya busantu mpe ba ke manga yina ke pesaka ngolo: kwenda ntama ya bawu.” Bawu zaba ve wapi kisika ba me katuka, ba lenda tuba kikuma ve.

⁷⁰ Mu ke vutukila awa bandinga ya Mpangi Booth Clibborn, nkundi ya munu, kana ya ke na kima mosi na yinza yina kele ya maka- . . . kima ya makangu yina Nzambi salaka ve, na yinza, ya kele mulet. Mulet kele kima ya nsi mingi kulutila bima nionso. Ya kele . . . yandi—yandi zaba ve yina yandi kele. Yandi lenda

kukibutisa diaka ve. Mulet lenda vukana ve na mulet yankaka samu na kubuta mulet mosi. Yandi me suka. Yandi zaba ve kisika tata ya yandi katukaka, to yandi zaba ve mama ya yandi, samu yandi kele mwa—mwa mbuluku na mpunda ya kento ya mbuta. Nzambi salaka mutindu yina ata fioti ve. Beno pesa kiyeka na Nzambi ve samu na diambu ya mutindu yina. Nzambi salaka diambu ya mutindu yina ata fioti ve. Nzambi tubaka, “Bima nionso ke buta kulandila mutindu ya yawu.” Yinga, tata. Kasi mulet kele. . . tata ya yandi vwandaka mbuluku mpe mama ya yandi vwandaka mpunda ya kento, yawu yina yandi zaba ve dikanda ya yandi. Yandi—yandi—yandi kele mpunda yina ke na kumeka na kuvwanda mulet, to mulet. . . to—to yandi ke na kumeka na kuvwanda mbuluku, mbuluku ke na kumeka na kuvwanda mpunda. Yandi zaba ve dikanda ya yandi. Mpe yandi kele kima mosi ya yintu-ngolo mingi kulutila yina nionso kele na yinza. Beno lenda ata fioti ve kutula mwa kivuvu na yandi.

⁷¹ Mpe ya kele mutindu yina bantu mingi kele na kati ya dibuundu. Bawu zaba ve nani kele tata ya bawu, bawu zaba ve nani kele mama ya bawu. Kima mosi kaka bawu kuzaba, ti bawu kele Presbyterien, Methodiste, Baptiste, to Pentecotiste, to kima mosi. Bawu zaba ve kisika ba me katuka. Mpe kiboba ya mbuluku, beno lenda nganina yandi mutindu nionso beno me zola, mpe yandi ke telema kuna mpe ke ningisa makutu ya yandi, mpe ke tala. Beno lenda longa bawu mpimpa ya muvimba, mpe bawu ke zaba diaka kima ve ntangu ba ke kwenda mutindu mosi na ntangu bawu kwisaka. Ntangu yayi, ya kele kaka kieleka. Mu zola lwadisa beno ve, kasi mu zola tuba na beno Kieleka.

⁷² Kasi ya ke na kima mosi bawu lenda sala, ba ke misadi mosi ya mbote. Oh, ba ke salaka, salaka, salaka, salaka. Yina bambukisaka munu nkonga ya ba-Arminien yayi yina ke mekaka ntangu nionso na kusala samu na kuzwa Zulu. Ya kieleka, mulet mosi. Oh, Kompani ya Lusalusu ya Bakento, mpe ba ke lamba bansunsu ya madia ya nkokila, samu na kufuta, longi. “Mpe beto fwana vwanda na makinu yayi, mpe mukembu yayi.” Ya ke kaka kusala, kusala, kusala, kusala, kusala, kusala, kusala. Mpe, bawu, ba ke na kusala samu na yinki?

⁷³ Beno yufula bawu, “Beno me kuzwaka Mpeve-Santu kubanda beno me kwikilaka?”

⁷⁴ Ba ke telemisa makutu ya bawu, mpe bawu zaba ve dikanda ya bawu, “Yinki nge zola tuba? Wapi me katuka nionso yayi? Yinki nge zola tuba, Mpeve-Santu? Mu me kuwaka ata fioti ve diambu mosi samu na Yawu. Oh, nge fwana vwanda fanatiki mosi.” Beno me mona, bawu zaba ve nani vwandaka tata ya bawu, to nani mama ya bawu vwandaka, mpe. Mpe beno fwana bula bawu na ntangu beno zola sala kima mosi, beno bula *awa* mpe beno bula *kuna*, mpe beno bula *awa* mpe beno bula *kuna*. Ya kieleka, kiboba ya mulet.

⁷⁵ Kasi, mu ke tuba na beno, beno lenda sala mutindu yina ve na mpunda ya kieleka. Na fimbu mosi kaka na kalavasi, mpe mpangi-bakala, ya me kwenda. Yandi zaba yina yandi kele. Oh, mutindu mbote ya kele na kunata mpunda ya kieleka! Ya ke mbote mingi na kutuba, “Kwenda, nkundi ya luzolo.” Oh, mpangi, simba mbote-mbote, kana ve yandi ke losa kiti na mupepe.

⁷⁶ Ya ke mutindu yina na Baklisto ya kieleka. Alleluia! “Beno kuyamba Mpeve-Santu. Beno balula bantima, beno nionso, mpe beno botama na Nkumbu ya Yesu Klisto, samu na mulemvo ya masumu ya beno.” Ba me kwenda, na nswalu nionso mutindu bawu lenda kwenda na masa, ba me kwenda. Bawu lenda pema ve na mwini mpe na mpimpa tii kuna ba ke kuzwa Mpeve-Santu. Samu na yinki? Beno zaba, Muklisto kuzaba nani vwandaka Tata ya yandi. Beno me mona, ya ke lomba bima zole samu na kupesa luzingu. Ya kieleka, tata na mama. Mulet zaba ve nani vwandaka tata ya yandi, to nani vwandaka mama ya yandi. Kasi beto zaba Nani vwandaka Tata mpe Mama, samu beto me butuka samu na Ndinga ya Nzambi yina me sonama, yina me siamisama na Mpeve. Pierre tubaka, na Kilumbu ya Pantekote, “Kana beno balula bantima ya beno mpe beno botama, beno nionso, na Nkumbu ya Yesu Klisto, samu na mulemvo ya masumu ya beno, beno ke kuzwa dikabu ya Mpeve-Santu.”

⁷⁷ Mpe, mpangi-bakala, Muklisto ya kieleka yina me butuka mbala zole, (oh, la la) mpeve ya yandi, kaka na ntangu yandi me ndima Ndinga, yandi ke kuzwa Mpeve-Santu. Yufula yandi kima mosi na ntangu yina! Yandi zaba kisika yandi me telema. “Nge ke kwikilaka na kubeluka ya Kinzambi?”

“Amen!”

“Nge ke kwikilaka na Kwizulu ya Zole?”

“Amen!”

⁷⁸ Beno yufula yawu na mulet. Nsambulu ya mulet, “Uh, mu zaba ve. Docteur Jones tubaka na kilumbu mosi. . .” Huh! Yawu yina, sala mutindu mosi na Saul. Beno me mona? “Oh, bawu zaba ve. Mbote, mu ke tuba na nge, dibuundu ya munu ke ndimaka Yawu ve.”

⁷⁹ Oh, mpangi-bakala, kasi bakala mpe kento yina me butuka mbala zole ke ndimaka kieleka kwizulu ya Mfumu Yesu, ba ke ndimaka ti bawu kele na Mpeve-Santu ti ya ke na Mpeve-Santu yina ke pesama.

⁸⁰ Ntangu yayi, Yesu tubaka. . . Kento yina na dibulu ya masa, “Beto ke sambilaka na mongo yayi, mpe ba-Juif ke sambilaka na Jerusalem.”

⁸¹ Yandi tubaka, “Kento, wa Mambu ya Munu! Ngunga ke kwisa, mpe yawu yayi, ntangu Tata ke sosa bayina ke sambila Yandi na Mpeve mpe na Kieleka.”

82 “Ndinga ya Nge kele Kieleka.” Mpe muntu yina ke tangaka Biblia mpe ke kwikila konso Ndinga yina Biblia me tuba, mpe ke landa bandongisila ya Yawu, mpe ba ke kuzwa Mpeve-Santu ya mutindu mosi na yina bawu kuzwaka, mutindu mosi bawu kuzwaka Yawu, ngolo ya mutindu mosi na ntangu bawu kuzwaka Yawu, yandi zaba nani Tata na Mama ya yandi vwandaka. Yandi zaba ti yandi me sukulama na Menga ya Yesu Klisto, yandi me butuka na Mpeve, yandi me fuluka na kupakulama ya Nzambi. Yandi zaba kisika yandi me telema. Ya kieleka! Yandi kele na Canaan. Yandi zaba kisika yandi me katuka. Ya kele mutindu yina na Muklisto ya kieleka. Yufula yandi, “Nge me kuzwaka Mpeve-Santu kubanda nge me kwikilaka?”

“Amen, Mpangi-bakala!”

83 Mu telemaka kilumbu yina pene-pene ya santu mosi ya kiboba, ya bamvula makumi yivwa na zole, yandi vwandaka tuba na pasteur ya yandi ya bamvula makumi nana, mu tubaka, “Nkooko ya kento?”

Na kikesa nionso mutindu ya lendaka vwanda, yandi tubaka, “Yinga, mwana ya munu ya bakala.”

84 Mu tubaka, “Ya me sala bantangu yikwa kubanda nge me kuzwaka Mpeve-Santu?”

Yandi tubaka, “Nkembo na Nzambi! Pene ya bamvula makumi sambanu me luta kubanda mu me kuzwaka Yawu.”

85 Ntangu yayi, kana yandi vwandaka mulet, yandi zolaka tuba, “Ntangu yayi, vingila fioti, mu me siamisamaka mpe ba losilaka munu masa ntangu mu vwandaka . . . Mbote, ya kieleka, mpe ba kotisaka munu na dibuundu mpe mu nataka mukanda ya munu na *kingandi*.” Oh, mawa! Bawu zaba mpe ve dikanda ya bawu.

86 Kasi yandi zaba kisika kinkuluntu ya yandi me katuka. Yandi vwandaka kuna ntangu yawu salamaka. Yandi me butukaka na masa mpe na Mpeve. Yandi zabaka, mpe masa yango na kusukula masa na nzila ya Ndinga, beno baka Ndinga.

87 Ntangu yayi beno tala mutindu ya me zonza, “Na bayina kele kati na Klisto Yesu.” Paul, ntangu yayi, beno bambuka moyo . . . Mu me baka ntangu ya yinda, kasi mu ke manisa ve kapu yayi. Kasi mu ke sala nswalu . . . Beno zola yawu? Oh, Ya ke tuba na beto kisika beto kele, kasi beto lenda sala yawu ve na nkokila mosi kaka. Beto fwana sala ngonda mosi to zole samu na yayi, konso nkokila, kulonguka Yawu mbote-mbote, Mpova na Mpova. Kuvuka na masolo samu na kotalisa yawu, Mpova na Mpova, mpe kotalisa beno ti Ya kele Kieleka. Ntangu yayi beno bika mu tanga nzila yango na nswalu nionso diaka.

Paul, ntumwa ya Yesu Klisto na luzolo ya Nzambi (na luzolo ya muntu ve), na basantu yina kele na Ephèse, mpe (kivukisi) na bantu ya kwikama kati na Klisto Yesu:

⁸⁸ Ya zola tuba, “Ba bokilaka bawu na kubasika, ba tulaka bawu na kingenga, mpe ntangu yayi ba me botama na Mpeve-Santu, mpe bawu kele kati na Klisto Yesu. Mu ke sonika mukanda yayi na beno, bankundi ya luzolo.” Oh! Mu me banza na Paul yina kele na bawu kuna na ntangu yayi, oh, yinki kiesee yayi! Mwa ntumwa yayi ya kiboba ba zengaka yandi yintu kuna. Mu telemaka kisika ba zengaka yandi yintu. Kasi, oh, yintu ya yandi kele na nzutu yina ya malu-malu, mpe ba ke zenga yawu diaka ata fioti ve. Mpe yandi kele kuna na bawu na ntangu yayi, ntumwa yina mosi sonikaka Yayi. Mpe yandi tubaka, “Na beno yina kele kati na Klisto Yesu! Na Mpeve mosi beto nionso me botama samu na kusala Nzutu yayi mosi.” Beno tala ntangu yayi.

Lemvo kuvwanda na beno, mpe ngemba, na Nzambi Tata ya beto, mpe. . . Mfumu Yesu Klisto.

Masakumunu kuvwanda na Nzambi mpe Tata ya beto Mfumu Yesu Klisto, yina me sakumuna beto na nionso. . .

Oh, nge me kuwa yawu, Charlie?

. . . me sakumuna beto na masakumunu nionso ya kimpeve. . .

⁸⁹ Ya kele ve mwa ndambu samu na bantumwa, mpe mwa ndambu samu na *yayi*, kasi Yandi me sakumuna beto na masakumunu nionso ya kimpeve. Mpeve-Santu yina mosi kulumukaka na Kilumbu ya Pantekote kele Mpeve-Santu mosi yina kele awa na nkokila yayi. Mpeve-Santu yina salaka ti Marie kuboka mpe yandi kutuba bandinga ya malu-malu, mpe yandi lutisa ntangu ya mbote mpe yandi kusepela, mpe yina salaka ti yandi sala mambu yina yandi salaka, ya ke Mpeve-Santu yina mosi awa na nkokila yayi. Mpeve-Santu yina mosi bikaka Paul na masuwa yina ya ntama, yina monanaka ya kifuluka mpe pene-pene ya kudinda, mpe na bilumbu mpe bampimpa kumi na yiya, kukondwa ngonda to bambwetete. Yandi talaka kuna mpe konso kitembo vwandaka na mpeve ya yimbi mosi na zulu ya yawu, ke tala yandi, yina vwandaka ngengisa meno ya yandi, mpe tubaka, “Mu ke zindisa nge, mbuta-muntu, ntangu yayi. Mu me kuzwa nge ntangu yayi.”

⁹⁰ Mpe na mwa ntangu fioti Paul kulumukaka na nsi samu na kusambila fioti, kuna vwandaka Wanzio mosi, mpe tubaka na yandi, “Kuvwanda na boma ve, Paul. Masuwa yayi ya ntama ke telema na kisanga yina kuna. Kwenda na ntwala mpe dia madia ya nge ya nkokila, mambu nionso ke tambula mbote ntangu yayi.”

⁹¹ Yandi kwisaka awa na miniololo na mwa maboko ya yandi, ya vwandaka benda yawu na makulu ya yandi, mpe yandi

tubaka, “Beno vwanda na kikesa, babakala, samu Nzambi, Wanzio ya Nzambi, ya yina mu kele kisadi, telemaka pene-pene ya munu mpe tubaka, ‘Paul, kuvwanda na boma ve.’” Mpeve-Santu yina mosi kele awa na nkokila yayi, Mpeve mosi yina ya Nzambi, ke na kupesa beto masakumunu mosi yina ya kimpeve.

. . . *yina sakumunaka beto na masakumunu nionso ya kimpeve na bisika ya mazulu. . .*

⁹² Oh, beto telema kaka muniti mosi diaka awa. “Na bisika ya Mazulu.” Ntangu yayi, ya ke kaka bisika nionso ve, kasi na bisika ya Mazulu. Beto me vukana na “Mazulu,” ya zola tuba ti kisika ya mukwikidi. Ti, kana mu ke na kusambila, beno ke na kusambila, to dibuundu ke na kusambila, mpe beto me kubama samu na Nsangu, mpe beto me vukana beto mosi kintwadi mutindu basantu, yina ba me bokila na kubasika, yina me botama na Mpeve-Santu, yina me fuluka na masakumunu ya Nzambi, yina ba me bokila, yina ba me soola, yina me vwanda na bisika ya Mazulu ntangu yayi, beto kele ya Mazulu na kati ya moyo ya beto. Bampeve ya beto me kotisa beto na atimosifere ya Mazulu. Oh, mpangi-bakala! Yawu yina, atimosifere ya Mazulu! Oh, yinki ke salama na nkokila yayi, yinki ke salama na nkokila yayi kana beto me vwanda na atimosifere ya Mazulu, mpe Mpeve-Santu kuningisa konso ntima yina me kula diaka me me kuma kima ya malu-malu kati na Klisto Yesu? Masumu nionso kele na nsi Ya Menga, kati na sambilu ya kulunga, na maboko ya beto ya kuzangula na Nzambi mpe bantima ya beto ya kuzangula, ya kuvwanda na bisika ya Mazulu kati na Klisto Yesu, ke sambila kintwadi na bisika ya Mazulu.

⁹³ Beno me vwandaka ntete kuna? Oh, mu me vwandaka kuna ti mu ke dila na kiese mpe kutuba, “Nzambi, kubika munu ata fioti ve mu katuka awa.” Kaka na bisika ya Mazulu kati na Klisto Yesu!

⁹⁴ Ke sakumuna beto na yinki? Kubeluka ya nzutu ya Kinzambi, kuzaba mambu na ntswala, luzayikisu, ba-vision, bangolo, bandinga ya malu-malu, bantendulu, ndwenga, luzabu, masakumunu nionso ya Mazulu, mpe kiese yina beto lenda kufwanikisa ve mpe ya kufuluka na Nkembo, konso ntima me fuluka na Mpeve, ke tambula kintwadi, me vwanda kintwadi na bisika ya Mazulu, ata dibanza mosi ya yimbi ve na kati ya beto, ata midinga ya dikaya mosi ve, ata robe mosi ya nkufi ve, ata mosi *yayi* ve, *yina to yankaka*, ata mpeve mosi ya yimbi ve, ata muntu mosi ve ke banza yimbi samu na yankaka, bantu nionso ke tuba na zola mpe na ngwisani, bantu ke wisana kintwadi na kisika mosi, “Na kintulumukina makelele mutindu kitembo ya ngolo katukaka na Zulu.” Yawu yina, “Ya me sakumuna beto na masakumunu nionso ya kimpeve.”

⁹⁵ Na yina Mpeve-Santu lenda kubwa na zulu ya muntu mosi, mpe kutuba, “MUTINDU ME TUBA MFUMU. Kwenda kisika

yayi mpe sala kima yayi.” Beno tala ya ke salama kaka mutindu *yina*. [Mpangi Branham me fina misapi ya yandi—Mu.] Beno me mona? “MUTINDU ME TUBA MFUMU. Sala kima yayi na kisika yayi.” Beno tala ya ke salama mutindu *yina*. [Mpangi Branham me fina misapi ya yandi.]

⁹⁶ “Ya me sakumuna beto kintwadi na masakumunu nionso ya Mazulu na bisika ya Mazulu.” Beno tala!

Kulandila mutindi yandi me ponaka beto. . .

⁹⁷ Beto ponaka Yandi, to Yandi ponaka beto? Yandi ponaka beto. Na wapi ntangu? Na nkokila yina beto ndimaka Yandi? Ponamaka!

Kulandila mutindu yandi me ponaka beto kati na yandi na ntwala ya bambandukulu ya yinza, ti beto ke vwanda ya santu. . . kukondwa kifu na ntwala ya yandi na. . . (ba-denomination?) . . . na zola:

⁹⁸ Na wapi ntangu Nzambi ponaka beto? Na wapi ntangu Nzambi ponaka beno bayina kele na Mpeve-Santu? Na wapi ntangu Yandi ponaka beno? Na ntwala ya mbandukulu ya yinza. Na mutindu ya Yandi ya kuzaba mambu na ntwala, Yandi monaka beno na ntwala mpe zabaka ti beno ke zola Yandi. Mpe na ntwala mbandukulu ya yinza kuvwanda, Yandi ponaka beno, mpe tindaka Yesu ti Yandi kuvwanda mulemvo ya masumu ya beno, samu na kuvutula beno na ngwisani, na Yandi mosi, na zola. Oh, mu ke zola ti beto vwanda diaka na mwa minuti.

⁹⁹ Beno bika munu, na ntwala beto kwenda ntama, mu vutuka, na Genese 1:26. Mu ke tubila yawu diaka na Kilumbu ya tatu. Ntangu Nzambi salaka muntu. . . Na ntwala Yandi sala muntu, Yandi kukibokilaka Yandi mosi “El,” E-l, El; E-l-h, “Elah,” “Elohim.” Mpova yango zola tuba, na Hebreux, “yina ke zingaka na yandi mosi,” nionso na Yandi mosi. Kima mosi ve kuzingaka na ntwala ya Yandi, Yandi vwandaka luzingu nionso yina me vwandaka ntete ve, yina ke zingaka na Yandi mosi! El, Elah, Elohim, zola tuba “yina me kulunga na nionso, yina kele na biyeka nionso, ya Ngolo nionso, yina ke zingaka na Yandi mosi.” Oh!

¹⁰⁰ Kasi na Genese 2, ntangu Yandi salaka muntu, Yandi tubaka, “Munu kele,” Y-a-h-u, J-u-v-u-h, *Yahweh*, “Yehowa.” Yinki ya zola tuba? “Munu kele Yandi yina na nzila ya yandi nionso ke zinga Yina salaka kima mosi na nzila ya Munu mosi, samu na kuvwanda mwana ya Munu, to samu na ntangu fioti, to na mutindu ya fioti, mosi ya bana ya Munu.” Nkembo! Samu na yinki? Yandi pesaka na muntu. . . *Yehowa* zola tuba ti “Yandi pesaka na muntu na kuvwanda nzambi ya fioti.” Samu ti Yandi kele Nzambi Tata, mpe Yandi salaka muntu nzambi ya fioti, na yawu Yandi ke zinga diaka ve na yandi mosi, Yandi ke zinga na dibuta ya Yandi. Elah, Elah, Elohim. Ntangu yayi, ntangu yayi Yandi kele Yehowa. *Yehowa*, zola tuba, “Yandi Yina ke zinga

na dibuta ya Yandi.” Ntangu yayi, Nzambi salaka muntu samu na kuyala na ntoto ya muvimba, yandi vwandaka na luyalu. Mpe ntoto vwandaka luyalu ya muntu. Ya ke Masonuku? Na yawu kana ya vwandaka kima ya yandi, yandi vwandaka nzambi na zulu ya ntoto. Yandi zolaka zonza, mpe ya zolaka vwanda mutindu yina. Yandi zolaka zonza *yayi*, mpe ya zolaka vwanda mutindu yina. Oh! Yandi yina, Nzambi, Yehowa, Yandi Yina vwandaka zinga yandi mosi, kasi ntangu yayi ke na kuzinga na dibuta ya Yandi, mpe bana ya Yandi na Yandi. Yawu yina.

¹⁰¹ Ntangu yayi, beno tanga yawu. Beto ke tubila yawu na Kilumbu ya tatu na nkokila, kana beto kuzwa ntangu ya mingi. Beto me bikala kaka na minuti kumi na tanu mpe beto ke. . . Mu banzaka ti mu ke kuma kisika mosi awa, kasi beto lenda ve, na kisika yina ba me tuba ti beto me baka kidimbu na nzila ya Mpeve-Santu yina ba silaka. Mbote mingi.

¹⁰² Ntangu yayi, na wapi ntangu ba bokilaka beto na kuvwanda bisadi ya Nzambi? Na wapi ntangu ba bokilaka Orman Neville samu na kuvwanda kisadi ya Nzambi? Oh, la la! Ya ke yitukisaka munu mingi. Mu ke tuba na beno, beto baka mwa Masonuku. Mu zola ti beno baka Ntete ya Pierre kapu 1:20. Mpe, Pat, baka Apocalypse 17:8. Mpe mu ke baka Apocalypse 13. Ntangu yayi beto zola kuwa awa, beno zola kuzaba na wapi ntangu Nzambi bokilaka beno samu na kuvwanda Muklisto. Oh, mu zola yayi. Yayi, “Muntu ke zinga kaka na dimpa ve, kasi na Ndinga nionso me basika na yinwa ya Nzambi.” Mbote mingi, Mpangi Neville, baka Ntete ya Pierre kapu 1:20. [Mpangi Neville me tuba, “1:20.”—Mu.] Mbote, tanga 1:19 mpe 1:20. Beno kuwa yayi. [“1:19 mpe 20.”] Yinga.

[Kasi na menga ya ntalu ya Klisto, yina kele mutindu ya mwana-dimeme yina kele ve na kifu to mvindu.]

[Yina soolaka Klisto na ntwala yandi yidika yinza, kasi samu na mambote ya beno yandi me monana na yinza na ntangu yayi ya nsuka.]

¹⁰³ Na wapi ntangu yandi soolaka Yandi? Na ntwala ya kusalama ya yinza. Mpangi Pat, tangila munu Apocalypse 17:8.

[Niama yina nge me mona vwandaka na moyo, kasi ntangu yayi yandi ke diaka na moyo ve; yandi fwana kubasika na dibenga ya yinda, samu na kuzimbana seko: mpe bantu yina ke zingaka na zulu ya ntoto ke yituka, bawu yina bankumbu kele ve ya kusonama na buku ya luzingu katuka mbatukulu ya yinza, ntangu ba ke tala niama yina vwandaka ya moyo, mpe yandi kele diaka na moyo ve, mpe yandi ke monana diaka ve.]

¹⁰⁴ Nani ke vunama? Nani ke vunaka na muntu yayi ya nsambulu mutindu Saül vunamaka? Muntu yayi ya mayele ya yimbi mpe ya kieleka ya kulunga ya lendaka vuna nani? Ata mpe yina So- . . . [Dibuundu me tuba, “Soolamaka.”—Mu.]

kana...[“ya lenda salama.”] kana ya lenda salama. Mbote mingi, Apocalypse 13:8, beno bika mu tangila beno yawu:

Mpe bantu yina nionso ke zingaka na zulu ya ntoto ke... bantu yina nionso ke zingaka na zulu ya ntoto ke sambila yandi, bawu yina bankumbu me sonamaka ve na buku ya luzingu ya Mwana-dimeme yina kufwaka na ntwala ya mbatukulu ya yinza.

¹⁰⁵ Na wapi ntangu ba tulaka bankumbu ya beto na kati ya Buku ya Luzingu ya Mwana-dimeme? Ntangu Mwana-dimeme kufwaka na ntwala ya mbatukulu ya yinza. Ntangu Nzambi vwandaka Yehowa, El, Elah, Elohim, yina ke zingaka na Yandi mosi. Ya ke kaka mutindu Diamant mosi ya nene mingi, mpe Yandi lendaka vwanda kima yankaka ve, kasi na kati ya Diamant yayi ya vwandaka na bisalu ya Yandi samu na kuvwanda Mvulusi. Na kati ya bisalu yayi, yina vwandaka na kati ya Yandi, vwandaka Munganga. Mbote, kima mosi ve lendaka vulusa mpe kima mosi ve lendaka belusa, kasi bisalu ya Yandi basisaka yawu. Na yawu, mpamba ve na ntwala yinza kusalama, mpamba ve Yandi zabaka, nionso yina Yandi ke talisa, ti Yandi ke vwanda Mvulusi, ti Yandi ke kwisa mpe ke kuma muntu mpe ke zinga na kati ya beto, mpe yandi zabaka ti na nzila ya bamputa ya Yandi beto ke beluka, Yandi kufwaka Mwana-dimeme na Buku ya Yandi na ntwala ya mbatukulu ya yinza, mpe sonikaka nkumbu ya beno na Buku yina na ntwala yinza kusalama. Oh!

¹⁰⁶ Beno kuwa Yayi! Predestination ke talaka na manima na prescience, mu zola tuba kusoola. Kusoola ke talaka na manima na prescience mpe predestination ke talaka na mambu yina ke salama na ntwala. Beno zimbana yawu ve, ti kusoola ke talaka na manima awa, yawu yayi, “Mu vwandaka dititi ya yimbi. Mu me butuka kati na masumu, mu salamaka na disumu ya nkú, mu kwisaka na yinza na kuzonzaka baluvunu, mu me butuka na kati ya bansumuki. Tata na mama mpe dibuta ya munu ya muvimba, bansumuki. Mu vwandaka dititi ya yimbi. Kasi, na mbala mosi, mu kumaka mbuma ya blé. Wapi mutindu yawu kusalamaka?” Yayi, yinki yayi? Kusoola. Nzambi, na ntwala ya mbatukulu ya yinza, soolaka ti dititi yina ya yimbi ke kuma mbuma ya blé. “Ntangu yayi mu zaba ti mu kele mbuma ya blé, samu mu me vuluka. Wapi mutindu mu me sala yawu?” Mu me tala na manima mpe mu me mona ti Yandi zabaka yawu, kubanda ntama. Na prescience Yandi monaka ti mu ke zola Yandi, na yawu Yandi salaka mulemvo na nzila ya Mwana ya Yandi Mosi, ti na nzila ya Yandi mu ke katuka dititi ya yimbi samu na kukuma mbuma ya blé. “Ntangu yayi, wapi kisika mu kele ntangu yayi?” Mu me vuluka, mu ke na kutambula na lemvo ya Nzambi. “Yinki predestination ke talaka?” Na mambu yina ke salama na ntwala. “Wapi sika Yandi ke nata munu, mpe wapi sika mu ke kwenda?” Amen. Beno yina. Yawu yina.

107 Ntangu yayi beto tanga fioti na ntwala, na manima beto ke manisa na mwa ntangu fioti.

Kulandila mutindu yandi. . . ponaka beto kati na yandi na ntwala ya bambandukulu ya yinza, ti beto ke vwanda ya santu. . . kukondwa kifu na ntwala ya yandi na zola:

Yandi zabaka beto na ntwala samu na lukumu ya bana, zabaka na ntwala samu na lukumu ya bana na nzila ya Yesu Klisto na yandi mosi, landila mambote ya luzolo ya yandi,

108 Yinki Yandi salaka? Yandi, na prescience, monaka beto na ntwala, na kuzabaka ti Yandi vwandaka Mvulusi, yina ke zinga na yandi mosi. Bambazi vwandaka ve, kima mosi ve; Nzambi kaka, Elah, Elohim, yina ke zingaka na Yandi mosi, kima mosi ve kasi Yandi mosi kaka. Kasi na kati ya Yandi vwandaka Mvulusi mosi. Mbote, yinki Yandi ke vulusa, kima mosi ve kuzimbanaka? Na kuzabaka ti, na yawu Yandi zabaka ti kisalu yayi ya nene na kati ya yandi ke talisa kima yina Yandi lendaka vulusa. Na yawu ntangu ya salaka yawu, na prescience Yandi talaka mpe Yandi monaka bayina nionso ke ndima Yawu. Mpe na yawu na kusalaka mutindu yayi, Yandi tubaka, “Samu na kuvulusa bayayi, mutindu mosi kaka mu lenda sala yawu, ya ke kukulumuka Munu mosi mpe kukuma muntu mpe kubaka disumu ya muntu na zulu ya Yandi, mpe kufwa samu na yandi, ti mu lenda vwanda Mosi yina ba ke sambila,” samu Yandi kele Nzambi, kima ya kusambila.

109 Na yawu Yandi kulumukaka mpe bakaka yawu na zulu ya Yandi. Mpe ntangu Yandi salaka yawu, Yandi salaka yawu ti Yandi lenda vulusa beno yina zola kuvuluka. Beno me mona yina mu zola tuba? Na prescience, Nzambi ya seko, Yina zabaka mambu nionso, monaka Mwana-dimeme, mpe Yandi fwaka Mwana-dimeme na ntwala ya mbatukulu ya yinza, mpe Yandi tulaka nkumbu ya beno na Buku ya Luzingu ya Mwana-dimeme. Mpe Yandi monaka luvunu ya Satana, yina yandi ke sala. Na yawu Yandi tulaka nkumbu ya beno kuna. Mpe Yandi tubaka ti mbeni ya Klisto ke vwanda muntu ya nsambulu mingi, muntu ya mbote, muntu ya lutondo, muntu ya mayele, muntu ya nsambulu, ti yandi ke vuna bayina Soolamaka kana ya lendaka salama. Kasi ya lenda salama ve, samu ba zabaka bankumbu ya bawu na ntwala ya mbatukulu ya yinza. Na kusoola Yandi ponaka bawu, mpe na predestination bawu zaba kisika ba ke na kukwenda. Yawu yina.

110 Ntangu yayi, nani lenda tula na yawu ntembe? Yawu yina Paul tubaka. Ya ke Masonuku ya Paul. Yawu ke bisono ya Paul. Yawu yayi yandi longaka na dibuundu ya yandi. Dibundu, kisika ya bawu, na ntwala ya mbatukulu ya yinza. Ntangu Nzambi, kati na bampasi ya Yandi ya kubuta, zolaka kubuta,

zolaka kubuta beno, na kuzabaka yina beno ke sala, Yandi tulaka beno na kisika yina beno lendaka vwanda kati ya Nzutu ya Yandi Mosi, samu na kuvwanda kento ya yinzo, samu na kuvwanda fermier, samu na kuvwanda longi, samu na kuvwanda profete, samu na kuvwanda *yayi* to samu na kuvwanda *yina*. Yandi tulaka beno na kisika ya beno. Na yawu ntangu beto me basika na yinsi ya ayi ya Egypte, na nzila ya kusantisama, mpe beto me botama na kati ya yinsi ya nsilulu. . . Mpamba ve, nsilulu ya Nzambi kele Mpeve-Santu. Éphésiens 4:30 me tuba, “Beno niongisa Mpeve-Santu ya Nzambi ve yina tulaka beno kidimbu samu na kilumbu yina ya ke vuukisa beno.” Na yawu Nzambi, yina zabaka dibuundu na ntwala, Yandi tubaka, “Mpe na bantu nionso, ke vwanda na bantu ba-million na ba-million yina ke tambula mutindu bantu ya nsambulu mpe ba ke vunama.” Bantu yina ke vunama ve ke vwanda bantu yina me kota na yinsi ya nsilulu, bayina ba me tulaka bankumbu ya bawu na Buku ya Luzingu ya Mwana-dimeme, mpe me kota na yinsi ya nsilulu, mpe ke na kusepela na yawu.

¹¹¹ Bantu mingi ke vwandaka na boma ti ba ke sala mambu ya buzoba. Bantu mingi ke vwandaka na boma ya ti Mpeve-Santu kusadisa bawu—bawu mambu ya nsoni na ntwala ya bantu. Bantu mingi ke vwandaka na boma ti ba ke dila, mpe ba-cherie ya bawu ke mona bawu ke na kudila, to mama, to nkalani ya bawu, to mfumu ya beno ya kisalu ke mona beno.

¹¹² Beno bika mu tuba na beno samu na muntu mosi na ntangu mosi, na ntwala ya kusukisa. Ya vwandaka na muntu mosi na nkumbu ya David, mpe ntangu nzasa ya Nzambi vwandaka kuna na yinsi ya ba-Philistin, ya vutukaka, ba vwandaka benda yawu na nzasa, ngombe mosi ya mbuta vwandaka benda yawu, ntangu David monaka nzasa yango kukwisa, yandi vwandaka me lwata mwa lele mosi, yandi kwendaka mbangu kuna, yandi dumukaka na zulu, mpe yandi vwandaka dumuka bisika nionso, mpe yandi kinaka mpe yandi dumukaka mpe yandi kinaka. Mpe, yandi, ntinu ya Israel! Mpe kento ya yandi talaka kuna na nela mpe yandi monaka yandi ke sala mambu ya kuyitikisa, yandi vwezaka yandi. Na yina, yandi tubaka, “Zoba! Yandi talaka yandi kuna, mutindu yandi vwandaka sala, kudumuka na zulu, mpe kudumuka bisika nionso mpe kusala mutindu yina. Na yina, yandi me kuma kilawu!” Mpe na nkokila yina ntangu yandi vutukaka, yandi tubaka, na bampova ya mutindu yayi, “Na yina, nge me pesa munu nsoni. Mpamba ve, nge, ntinu, bakala ya munu, kusala mutindu yina kuna, kusala mambu ya mutindu yina!”

¹¹³ David tubaka, “Mbasi mu ke sala diaka ya kulutula yina. Yinga, tata!” Yandi tubaka, “Nge zaba ve ti ya ke na ntwala ya Mfumu mu vwandaka kina?” Yandi vwandaka na simu yina! Yandi vwandaka na yinsi ya nsilulu. Yandi zimbisaka balukumu ya yandi nionso mpe kubeba ya yinza. Yandi vwandaka na kiesa

mingi samu na kuzaba ti nzasa vwandaka kota na kati ya mbanza ya yandi mosi.

114 Mpe, oh, mu ke tuba na beno, bantu mingi ke vwandaka na boma ya kuzwa Mpeve-Santu, na boma ti ba lenda tuba na bandinga ya malu-malu. Ba ke vwandaka na boma ti muntu mosi lendaka tuba, “Ntangu yayi, yandi kele mosi ya bantu yina ke tubaka na bandinga ya malu-malu.” Ba ke vwandaka na boma na kukwisa na yinzo-Nzambi mpe ba botika bawu na Nkumbu ya Yesu Klisto, samu ba ke na nsoni ya Yawu. Uh! Oh!

115 Muntu mosi vwandaka tuba ti mu fwana katula ba-bande ya munu, samu mu longaka mbotika kele na Nkumbu ya Yesu Klisto. Mu ke katula yawu ve. Mu ke sala diaka ya kulutula mingi! Ya kieleka, ti, mu ke sala diaka ya mingi! Ya ke Biblia. Kana bawu me zola ve samu na yina beto salaka mazono, beno tala mbote yina beto ke sala mbasi! Yawu yina beto fwana sala, beno me mona, beno landila kaka na kukwenda na ntwala. Ya ke na nsuka ve samu na yawu, samu ya kele ya Mfumu. Ya kele Nzambi.

116 Beno zaba yina Nzambi salaka? Nzambi talaka katuka kuna na Zulu, Yandi tubaka, “David, nge ke muntu landila Ntima ya Munu.” David vwandaka na nsoni ve. Yandi vwandaka kisadi ya Mfumu. Yandi zolaka Mfumu. Mpe yandi vwandaka na kiese mingi, na kiese ya kulutula mingi, na mutindu ti yandi banzaka ve na lulendo ya bumuntu.

117 Beno me mona, mutindu mu tubaka na dilongi ya suka yayi, beto ke na boma mingi, ti, beto zola Saül kulonga beto, beto zola Saül yina me katuka na seminere samu na kutuba na beto wapi mutindu beto fwana sadila nsambulu ya beto mpe wapi mutindu beto fwana sala yawu. Ya ke na simu yina yankaka ya Jourdain. Na simu yayi, Mpeve-Santu ke na kutwadisa. Na lweka yayi beno ke na nganda ya kubeba. Na lweka yayi beno ke ya kipe ve yina bawu lenda banza. Na lweka yayi beno ke ya kufwa, mpe luzingu ya beno me bumbama kati na Klisto. . . mpe ya me baka kidimbu ya Mpeve-Santu. Beno ke kipe ve. Beno ke na kuzinga na Canaan. Beno lenda kudia blé ya mbote. Beno kele kivangu ya malu-malu kati na Klisto Yesu. Beno ke kukwenda na yinsi ya nsilulu.

118 Mu ke bambuka moyo ntangu mu vwandaka ya kutelema kuna, Mpangi Collins, mwa bamvula makumi tatu me luta, ntangu yinzo-Nzambi yayi vwandaka me tungama ntete ve. Ya vwandaka mwa lukutakanu mosi na tenta awa na nsongi, lukutakanu ya munu ya ntete. Mu vwandaka longa Nsangu yayi ya mbote, kima ya mutindu mosi, bumvwama ya nene mingi ya Klisto: mbotika ya masa na Nkumbu ya Yesu Klisto, kukwikila ti Ndinga nionso kele ya Kieleka, mbotika ya Mpeve-Santu, kubeluka ya nzutu ya Kinzambi, bangolo ya Nzambi, kaka mutindu mu ke na kulonga Yawu na ntangu yayi, mu me sobaka

Yawu ata fioti ve. Nzambi me talisa na munu mambu mingi ya Yawu, na yawu, mutindu Yandi ke talisa Yawu, mu ke landila kaka na kulonga Yawu. Yandi me katula ata fioti ve na yina vwandaka, Yandi ke na kulandila kaka na kubwelaka ya kulutila na zulu ya Yawu.

¹¹⁹ Mu telemaka kuna ntangu bantu pene ya nkama mosi telemaka kuna na lweka ya masa, ba vwandaka yimbila, “Mu me telema na lweka ya Jourdain, mpe meso ya munu ke tala ntama, mu ke mona Canaan kuna mpe yinsi ya kiese, kisika bimvwama ya munu kele. Ntangu mu ke kuma na simu yina ya lusakumunu, ntangu mu ke kuma kuna mpe kuvwanda na Tata ya munu. . . mpe kupema kimakulu?” Ntangu bawu bandaka na kuyimbila yawu, Mu vwandaka kotisa na masa ntwenia mosi ya bakala samu na kubotika yandi na Nkumbu ya Mfumu Yesu. Mu tubaka, “Tata ya Mazulu, mutindu mu ke nata ntwenia yayi ya bakala na Nge kulandila kundima ya yandi. . .” Mu vwandaka mpe ntwenia ya bakala, munu mosi, mu ke na bafoto ya yawu na yinzo. Mu tubaka, “Ntangu mu ke botika yandi na masa, Mfumu, kulandila kundima ya yandi, na Nkumbu ya Yesu Klisto Mwana ya Nzambi, Nge fulusa yandi na Mpeve-Santu.” Mpe kaka na ntangu yina Kima mosi bandaka na kubaluka, mpe tala Yandi kulumukaka na kubalukaka, Mbwetete yina ke Semaka na Suka vwandaka kuna. Nsemo yina beno ke na kumona na foto vwandaka kuna. Ya vwandaka kuna.

¹²⁰ Yawu kwendaka bisika nionso na yinza, kuna na Canada mpe bisika nionso. Ba tubaka, “Nsemo mosi ya mansweki me monana na zulu ya longi ya Baptiste na yina yandi vwandaka botika.”

¹²¹ Mwa bilumbu fioti me luta, ntangu Docteur Lamsa kwisaka na munu, mpe yandi zabaka ata fioti ve kima mosi samu na yawu, mpe yandi natilaka munu foto mosi, mpangi-bakala yango ke na yawu na ntangu yayi. Nge ke na foto yango? Nge ke me nata Biblia, kuna, ya ke na kati ya buku ya nge? Mbote mingi. Ya vwandaka na foto ya kidimbu ya ntama ya Hebreux ya Nzambi, kaka mutindu yina vwandaka na bilumbu ya Job, na ntwala ba sonika Biblia. Nzambi na bisalu ya Yandi tatu, banzambi tatu ve. Nzambi mosi na bisalu tatu: Tata, Mwana, mpe Mpeve-Santu, bisalu tatu yina Nzambi me sadila. Banzambi tatu ve, bisalu tatu! Mpe Yawu yina. Ntangu muntu yina ya nene, Docteur Lamsa, lubangulu Lamsa ya Biblia, ntangu yandi tubaka na suka yina. . . Ntangu mu tubaka na yandi ti, mu tubaka—mu tubaka, “Yinki kele kidimbu yango?”

¹²² Yandi tubaka, “Yina ke kidimbu ya ntama ya Nzambi, na Hebreux. Nzambi, Nzambi mosi na bisalu tatu.”

Mu tubaka, “Mutindu Tata, Mwana, mpe Mpeve-Santu?”

¹²³ Yandi tubaka diaka ve, mpe yandi tululaka dikopa yandi ya café, yandi talaka munu. Gene, mu ke kwikila ti nge vwandaka

kuna, Leo. Yandi tubaka, “Nge me kwikila yawu?”

Mu tubaka, “Na ntima ya munu ya muvimba.”

¹²⁴ Yandi tubaka, “Mazono na nkokila, ntangu mu vwandaka na lukutakanu ya nge, Mpangi Branham, mu monaka kuswasikisa yina ya mabanza. Mu me monaka yawu ntete ve na Amerika, na yinsi ya munu.” Yandi tubaka, “Bantu yayi ya Amerika zaba ata Biblia ve. Kima mosi kaka bawu zaba kele denomination ya bawu. Bawu zaba ata kisika ba me telema ve.” Yandi tubaka, “Bawu zaba kima mosi ve.” Yandi tubaka, “Kasi ntangu mu vwandaka kuna na nkokila yina,” yandi tubaka, “Mu tubaka. . .” Ntangu yayi, Mpangi Gene, mu ke tuba yayi na luzitu mpe zola mpe nionso yina. Yandi tubaka, “Mu tubaka, ‘Ya fwana vwanda profete.’ Kasi ntangu mu monaka ti nge ke kwikilaka ti Tata, Mwana mpe Mpeve-Santu vwandaka banzambi tatu ve, yawu vwandaka bisalu, na yawu mu zaba ti nge kele profete ya Nzambi, kana ve ya lendaka talisama na nge mutindu yina ve.” Yandi tubaka, “Yina ke kidimbu mosi ya kulunga.” Yandi tubaka, “Ata fioti ve mu me. . .” Yandi tubaka, “Nge ke Unitaire?”

¹²⁵ Mu tubaka, “Ve, tata. Mu kele Unitaire ve. Mu ke kwikilaka na Nzambi yina kele Nzambi ya Ngolo nionso, mpe bisalu tatu kele kaka bisalu tatu yina Nzambi mosi zingaka na kati ya yawu.”

¹²⁶ Yandi tubaka, “Ntima ya nge kusakumuka!” Yandi tubaka, “Kilumbu mosi nge ke mwangisa menga ya nge na zulu ya ntoto samu na yawu, kasi,” yandi tubaka, “baprofete ke kufwaka ntangu nionso samu na yina ba ke ndimaka.”

¹²⁷ Mpe mu tubaka, “Na yawu bika yawu vwanda mutindu yina, kana ya me sepelisa Mfumu ya munu.” Lubangulu Lamsa ya Biblia.

¹²⁸ Oh, ya ke ya kieleka mingi. Mbala yikwa, mutindu mu me tuba na dibuundu yayi, mutindu Samuel tubaka na ntwala bawu ponaka Saül, “Na ntwala beno kwenda kuna samu na kukota na mwa denomination mosi ntangu yayi, mpe beno kangaka beno mosi na bansinga ya mwa nsambululu, samu na yinki beno lenda bika ve Mpeve-Santu kutwadisa beno?” Samu na yinki beno lenda baka Nzambi ve mutindu Ntwadisi ya beno mpe kubika Yandi sakumuna beno, mpe beno zimbana denomination ya beno? Ntangu yayi, mu ke tuba ve ti beno vwanda ve mosi ya dibuundu ya denomination, beno vwanda mosi ya konso dibuundu yina beno me zola. Ya me tala beno. Kasi mu ke tuba na beno, mutindu muntu, beno bika Mpeve-Santu kutwadisa beno. Beno tanga Biblia. Mpe yina Biblia me tuba na kusala, beno sala yawu. Nzambi sakumuna beno.

¹²⁹ Mpe ntangu yayi mu me vingila ntangu ya yinda. Mu ke kukiyufula kana ya ke na muntu mosi awa yina me zola kukwisa na ndonga ya bisambu samu ba sambila yandi. Kana bawu kele,

bawu lenda telemisa maboko ya bawu. Kaka, mosi, zole, tatu. Mbote mingi. Na yawu beno nionso kukwisa awa mpe beno telema awa kana beno me zola, na ntangu yayi, mpe—mpe beto ke sambila. Na yawu beto ke . . . Mu zola ve ti beno kwenda ntete. Mu zola sala pwelele kima yankaka awa ntete beto—beto manis.

¹³⁰ Bantu yikwa ke zolaka kulonguka Buku ya Galates . . . oh, mu zola tuba Éphésiens? Ntangu yayi, na Kilumbu ya tatu na nkokila, beto ke mona Kidimbu. Na yawu na Lumingu ke kwisa na suka, beto ke mona kisika ba me tula dibuundu. Oh, kana . . . beto ke mona yawu mu banza, na nkokila ya Kilumbu ya tatu ke kwisa, samu na beno bayina kele awa na Jeff. Kutula dibuundu na kisika ya yawu, mosi na mosi. Mutindu ba me bokila beto na nzila ya lukumu ya bana. Nzambi pesaka beto lukumu ya bana samu na kuvwanda bana ya babakala, beto kele bana ya babakala na nzila ya lubutuku. Ya me pesa beto lukumu mpe me tula beto na kisika ya beto na nzila ya Mpeve-Santu. Beno tala! Bawu nionso vwandaka ba-Hebreux, ntangu bawu zabukaka nzadi, kasi Josué kabulaka yinsi mpe pesaka mosi na mosi ntoto ya yandi landila yina mama ya mosi na mosi tubaka na lubutuku, kisika Mpeve-Santu tubaka na mama.

¹³¹ Beno tala Jacob ntangu yandi vwandaka kufwa, profete mosi, meso ya kufwa, yandi mataka na mfulu, yandi tubaka, “Beno kwisa beno bana ya Jacob mpe mu ke tuba na beno kisika beno ke vwanda na kilumbu ya nsuka.” Nkembo! Oh, mu zaba ti mu ke yitukisa. Bantu ke monana ya kuyitukisa. Kasi, oh, kana beno zabaka kaka bukieleka, yina ke pela na kati ya ntima! “Beno kwisa mpe mu ke tuba na beno kisika beno ke vwanda na bilumbu ya nsuka.” Mpe mu lenda baka Masonuku yina mosi, mpe mu baka kalati ya yinza yina ke talisa kisika ba-Juif kele bubu yayi mpe kusiamisa na beno ti bawu kele kieleka na kisika yina Jacob tubaka ti ba ke vwanda na kilumbu ya nsuka. Mpe ba vwandaka ata fioti ve, kuna, ba vwandaka ntete ve na kisika yina tii kuna bawu vutukaka na kilumbu ya sambwadi ya Ngonda ya tanu, 1946, na mpimpa yina Wanzio ya Mfumu monanaka na munu kuna mpe pesaka munu kosalu yayi. Mpe mu lenda talisa na beno ti, ntangu bawu vutukaka na yinsi ya malu-malu, bawu kumaka kieleka na bisika yina Jacob tubaka na bawu ti ba ke vwanda. Mpe bawu yina kuna bubu yayi. Oh, oh, la la, oh, la la! Beto me kuma pene-pene ya Yinzo, yimeni.

¹³² Bankundi ya luzolo, beno kele na kimbevo, kana beno zolaka telemisa kuna ve kukondwa kikuma. Mu kele mpangi ya beno ya bakala. Mu ke na kosalu yina me katuka na Nzambi samu na kusambila samu na bambevo. Ya kele ve ti mu . . . mutindu mu ke na ngolo ya kubelusa, mu ke na yawu ve. Kasi mu ke na lulendo ya kusambila. Mutindu na suka yayi, David vwandaka na kima yankaka ve kasi mwa lanse ya matadi, kasi yandi tubaka, “Mu zaba yinki ya ke sala na lulendo ya Nzambi.” Beno me mona? Mu kele kaka na mwa kisambu mu lenda sala samu na beno, mpe

kutetika maboko ya munu na zulu ya beno, kasi mu zaba yina lukwikilu kati na Nzambi ke sala. Yina ya salaka samu na bantu yankaka, ya ke sala mpe samu na beno. Beno kwikila yawu na ntangu yayi mutindu beno ke na kukwisa, beno pusana mwa fioti tii na kisika yayi.

¹³³ Ntangu yayi, mu ke na kukiyufula, samu yayi kupesa kikesa, kana mu lendaka lomba na mpangi ya munu ya bakala na kukwisa awa samu na kukusa bawu mafuta. Nge zola sala yawu, Mpangi Neville? Mu ke lomba na dibuundu kana beno zola kulumusa yintu samu na kusambila.

¹³⁴ Ntangu yayi beno bambuka moyo, na lumingu yina me luta ntangu mu vwandaka bela mingi na mafuta ya ricin, mu zolaka pesa konso kima yina samu muntu mosi kukwisa tetika maboko na zulu ya munu. Kana muntu mosi kukwisaka, muntu yina Nzambi sakumunaka mpe sadisaka, mu zolaka sepela na yawu mingi. Ntangu yayi ya ke beno ke na nsatu yina mu vwandaka na yawu na ntangu yina. Ntangu yayi beno zola ti mu sala yina mu zolaka ti muntu mosi kusala samu na munu na ntangu yina. Ti Nzambi kubika munu ve kubika kusalu. Ti mu kwenda kaka, ata ti mu ke ya kulemba, ata ti mu ke na kikesa ve, ata ti mu ke na mpasi ya kutula dikulu mosi na ntwala, mu kwenda kaka, samu ti mu ke kutana diaka na beno nionso, na Yinsi yina kuna.

¹³⁵ Na yawu beno biboba ya bakento, biboba ya babakala, ya kukondwa kikesa, na bansuki ya mpembe mpe yina ke na kuzenganaka, mpe yina ke na kuzenganaka bitini-bitini mutindu felele yayi rose yina me basisa mwa felele ya fioti, yina me zimbisa tinta ya bafelele ya yawu mpe yina ke na kubeba, beno ke na kulemba, mutindu yina ve? Ya ke mbote. Kaka . . . Mpe kima mosi kaka ke kanga awa kele kusema samu na nkembo ya Nzambi. Na yawu ntangu mbeni me tula beno ba-grappin kuna mpe ya me kanga beno, mu me kwisa na lanse ya matadi ya Nzambi, na lukwikilu, na dikabu yina Nzambi pesaka munu. Tala yina mu tubaka, samu ti beno bakula yawu. Mu tubaka, "Kana Pierre lendaka kota, to mosi ya bawu." Beno tuba mutindu yina ve. Beno sambila samu na munu ve. Beno kota kaka mutindu yayi, mpe beno tuba, mutindu na kento yayi, beno tuba, "Nge ke Mpangi-kento *kingandi*?" Nkumbu ya nge kele nani? Mpangi-kento Howard. Beno tuba, "Nge ke Mpangi-kento Howard. Nge ke mukwikidi, Mpangi-kento Howard? Nge ke kwikila. Nge ke mukwikidi. Na yawu, nge me mona, nge ke na muswa ya masakumunu nionso ya mpulusu." Na yawu mu ke tuba, "Mpangi-kento Howard, mambu nionso ke tambula mbote," mpe mu ke kwenda. Oh, ya ke . . . Mu tubaka, "Mu ke boka, mu ke sepela." Mu ke tuba, "Mfumu, ya ke salama. Ya ke salama."

¹³⁶ Mpe mu banzaka, "Mbote, bantu ke banzaka mutindu mosi na ntangu mu ke sambilaka samu na bawu." Ya ke mutindu yina. Beno me mona yina mu zola tuba?

¹³⁷ Mpe mu telemaka kuna, bambala mingi, na bantu, mpe mu vwandaka tuba, “Oh, mpangi-kento ya ntalu, nge ke kwikila Yawu? Oh, nge ke kwikila Yawu?” “Mfumu, O Nzambi, sala ti bawu kwikila Yawu. Pesa bawu lukwikilu samu ba kwikila Yawu.” “Oh, na lemvo ya nge, nge me ndima Yawu ntangu yayi?” Ya ke mutindu yina ve. Mu me lutaka yawu. Mu me lutaka yawu.

Mu ke tubaka kaka mutindu yayi, “Mpangi-kento Howard, nge ke mukwikidi?”

“Yinga, mu kele mukwikidi.”

¹³⁸ “Mbote mingi, Mpangi-kento Howard, kana nge ke mukwikidi, nge kele munkwa ya bima nionso yina Nzambi kele na yawu.” Mpe kubaka kaka diboko ya yandi. Beno me mona, mu me kwikila yawu. Mu ke kota na ngwisani na Mpangi-kento Howard na kutetikaka maboko ya munu na zulu ya yandi. Yesu tubaka ata fioti ve “beno sambila samu na bawu,” Yandi tubaka, “Beno tetikaka kaka maboko na zulu ya bawu.” Yawu yina, na manima yandi ke beluka. Yandi lenda tuba, “Mambu nionso ke tambula mbote,” Mpangi-kento Howard. Na manima nge lenda vutuka na yinzo mpe nge beluka. Nzambi sakumuna nge.

¹³⁹ Nge ke Mpangi-kento...[Mpangi-kento me tuba, “Hampton.”—Mu.] Mpangi-kento Hampton, nge ke mukwikidi, mutindu yina ve? [“Mutindu yina.”] Nge ke munkwa ya bima yina nionso Yandi pesaka. Nzambi kuvwanda na nge, Mpangi-kento Hampton. Vutuka na yinzo mpe beluka ntangu yayi. Yesu Klisto ke belusa nge.

¹⁴⁰ Nge ke Mpangi-kento...[Mpangi-bakala mosi me tuba, “Slaughter.”—Mu.] Slaughter. Ya ke...Nge ke muntu yina beto sambidilaka na lupitalu. Nge ke mukwikidi, na yawu, Mpangi-kento Slaughter, nge kele munkwa ya bima nionso beto ke lomba. Mpangi-kento Slaughter, bika nge kuzwa yina nge me lomba, mpe beluka. Nzambi ke pesa yawu na nge.

¹⁴¹ Mpangi Gene, nge me kwikila ti Nzambi ke pesa yawu na nge? [Mpangi Gene me tuba, “Yinga, tata. Yinga, tata.”—Mu.] Mpe bika Mfumu Nzambi kupesa nge, Gene, kieleka yina nge me lomba!...?...

¹⁴² Mu zaba nge. [Mpangi-kento ke na kutuba—Mu.] Nge ke mukwikidi, mpangi-kento. Mu zaba nge. Yina kele bakala ya nge kuna. Yandi ke muntu yina mu sambilaka na alo-alo kilumbu yina. Mu ke bambukaka yawu ntangu nionso. Yandi lendaka kwenda ve na lukutakanu ya Tulsa. Kukwisa na lukutakanu. Mpe Mfumu belusaka yandi, mpe tindaka yandi na lukutakanu. Na ntumunu nge me telema samu na muntu yankaka. [“Mwanampangi ya munu.”] Ya ke kieleka kidimbu ya Muklisto, mpangi-kento! Beno me mona? Yandi vwandaka diaka na ntumunu, Yandi bakaka kisika ya beto nionso. Nge ke mukwikidi mpe nge ke na muswa ya bima nionso Nzambi silaka. Mu ke kisadi ya

Yandi. Mpe na Nkumbu ya Yesu Klisto, mu ke pesa nge yina nge me lomba.

¹⁴³ Kwisa, Mpangi Neil. Nzambi sakumuna nge. Ya vwandaka yimbi mingi samu na nge. Nge ke mukwikidi. Mu zaba ti nge ke mukwikidi. Mu ke kwikila ti Nzambi ke pesa nge bima nionso nge me lomba, samu nge ke mukwikidi. Mpe mutindu kisadi ya Yandi, samu na nge, mpangi ya munu ya bakala, na Nkumbu ya Yesu Klisto, mu ke pesa nge nsatu ya ntima ya nge. Kwenda mpe kuzwa yawu. Nzambi sakumuna nge.

¹⁴⁴ Mpangi-kento Bruce, mu zaba nge. Kibuki yina kwangaka mukongo ya munu yandi me zaba nge. Yandi me katuka kuna pene-pene ya Motel JJ, Twin J, to kima mosi ya mutindu yina. Nge ke telema samu na bantu yankaka. Mpe yinki kele nsatu ya nge na nkokila yayi na ntwala ya Tata ya nge? [Mpangi-kento Bruce me tuba, “Samu na munu mosi, na nkokila yayi.”—Mu.] Samu na nge mosi, na nkokila yayi. [Mpangi-kento Bruce ke na kutuba diaka.] Na yawu, mbeni me losa kuna na ntwala ya dokotolo, kasi mu ke landa nge, na lanse ya matadi. Mpe na Nkumbu ya Yesu Klisto, Mu ke ludika lanse ya madinga kuna na ditadi yina me sala ti ba-rein kukangama. Ya ke vutula nge na Nzambi, na yinzo ya Yandi.

Beto me lomba Nge, na Nkumbu ya Yesu Klisto. Amen.

¹⁴⁵ Nge ke tata ya bakala yayi, tata? Nge ke mukwikidi? [Mpangi-bakala ke na kutuba—Mu.] Nge ke na hernie na lweka mosi ya nge; na nsi, na lweka ya nge ya kikento. Nge ke kwikila ti Nzambi ke pesa yawu na nge, tata, mpe mutindu kisadi ya Yandi?

¹⁴⁶ Mfumu, mbala yankaka diboko yayi me sala mingi kisalu na kilumbu. Ya me kwisa awa samu na kikuma mosi, samu na kusala kima mosi. Pesa yawu, nsatu ya ntima ya yandi, Tata, mutindu mu ke sambila na Nkumbu ya Yesu ti Nge ke pesa yawu. Amen.

¹⁴⁷ Kutula ntembe ve. Hernie yina ke niongisa nge diaka ve kuna, mpe nge ke kuma mbote. Nzambi sakumuna nge . . . ? . . .

¹⁴⁸ [Mpangi-kento mosi me tuba, “Ya ke salaka yintu ya munu mpe laka ya munu mpasi. Ya ke salaka bampanzi ya munu mpasi ntangu mu ke kosulaka. Mu lenda yimba ve. Mu lenda sala kima mosi ve. Munu . . . ? . . . Mpe lenda lala mingi ve. Mu lenda sala ata kima ve.”—Mu.] Nge ke mukwikidi, mutindu yina ve? [“Mutindu yina. Mu ke ya kifuluka na Mpeve-Santu.”] Nge ke mukwikidi. [“Mu zaba ti Nzambi ke zinga na kati ya nge.”] Mpe nge ke—nge ke munkwa ya masakumunu nionso. [“Mu zaba. Mpe mu me kwikila. Mu ke kwikilaka na bisambu ya nge, Mpangi Branham. Mu ke kwikila ti Nzambi ke belusa munu. Mu ke kwikila ti Yandi ke pesaka mvutu na bisambu ya nge.”] Matondo na nge.

¹⁴⁹ Tata, mu me nata yayi, mpangi ya munu ya kento, na nzila ya tiya, na kati-kati ya cible. Mpe mu ke vutudila nge yandi, katuka na ngolo ya mbeni, na Nkumbu ya Yesu Klisto. Amen.

150 Ya ke vwanda kaka mutindu yina.

151 [Mpangi-kento mosi me tuba, "...?...Mu ke na poumon yina zola kufwa, mpe mosi me kufwa."—Mu.] Kupasula ya poumon.

152 O Mfumu, mutindu kento yayi ya ntwenia me telema awa, ya ke monana ntete na buntwenia ya yandi, mu ke sambila samu na yandi. Mpe kana ba me katula poumon, mpe yandi ke kondamana, luzingu ya yandi ya muvimba. Nge ke Tata ya beto, mpe mu ke ludika tiya ya kisambu na yandi, Mfumu, mbala mosi kuna na poumon yina. Mu ke tinda kisambu yayi na Nkumbu ya Yesu Klisto. Bika yawu bula na poumon yina mpe ya belusa yawu. Na Nkumbu ya Yesu Klisto, mu ke lomba yayi. Amen.

153 Nge ke Mpangi-kento . . . [Mpangi-kento me tuba, "Mpangi-kento Gibbs."—Mu.] Mpangi-kento Gibbs. ["Awa na kati ya yintu, mpe ya ke sala mpasi."] Ya kieleka. Yintu ya nge kele mbote ve samu na munu. Nge ke mukwikidi mpe munkwa ya masakumunu nionso ya Nzambi, Mpangi-kento Gibbs.

154 Mfumu, mu ke nata yandi na Nge, na mwa lanse yina Nge pesaka munu, mutindu Nge pesaka David lanse mosi, samu na kukeba mameme ya tata ya yandi. Mpe kana mbeni kulandaka dimeme, yandi vwandaka na boma ve. Yandi vwandaka baka mbala mosi mwa lanse yina mpe yandi vwandaka landa bankosi mpe—mpe ba-ulusu, mpe yandi botulaka dimeme yango. Yayi ke kisambu ya lukwikilu. Nge tubaka na munu ti kana mu lendaka "nata bantu na kukwikila na munu mpe kuvwanda ya kusungama." Mu ke vutula Mpangi-kento Gert na nkokila yayi. Mu ke botula yandi na maboko ya mbeni. Yandi ke dimeme ya Nge. Mu ke vutula yandi na lupangu ya Tata, na Nkumbu ya Yesu Klisto. Amen.

155 [Mpangi-kento mosi me tuba, "Mpangi-kento Lowe."—Mu.] Mpangi-kento Lowe. ["Mu ke na tension."] Hypertension. Mpe nge ke mukwikidi, mutindu yina, Mpangi-kento Lowe? Munkwa ya masakumunu nionso.

156 Na yawu, Tata Nzambi, mu ke lomba kisambu yayi na nkokila yayi, mutindu lanse ya Nzambi, samu na hypertension ya Mpangi-kento. Mpe bika ti na ntangu dokotolo ke tala diaka menga ya yandi, bika ti yandi tala yandi mpe yandi tuba, "Ya me kuma mbote ntangu yayi." Mpangi-kento ke zaba yina me sala yawu. Na Nkumbu ya Yesu Klisto, mu ke pesa yawu na yandi. Amen.

157 [Mpangi-bakala mosi ke na kutuba na Mpangi Branham—Mu.] Ee. Mu zolaka ti tata ya munu kuvwanda awa na nkokila yayi, mu zolaka sambila samu na yandi malu-malu yayi. Mu ke sala yawu samu na ya beno, mpe. Mu me bakula.

158 Tata ya Mazulu, bakala yina butaka mwana ya bakala yayi, ti yandi kele awa na ntoto na nkokila yayi samu na yandi. Mpe mwana ya yandi ya bakala ke na nsatu ti tata ya yandi kuvutuka;

yandi katuka kuna na yinza ya masumu, alkole. O Mfumu, mu ke tinda kisambu yayi na lukwikilu mpe ngolo, mpe na nionso yina mu lendaka losa yawu, mwa ditadi yayi, na Nkumbu ya Mfumu Yesu. Mu ke bula yawu na mpeve yina ya yimbi yina me tula kima yina kuna. Mpe bika ti yawu katuka. Mpe bika ti yandi kwisa na lupangu na bukebi nionso, na Nkumbu ya Yesu. Amen.

¹⁵⁹ [Mpangi-bakala mosi me tuba, “Sambila samu na munu, Mpangi Branham, samu mu kuzwa Mpeve-Santu. Mu zola kuzwa Mpeve-Santu. Mu ke na mfunu ya yawu. Mu ke na nsatu ya yawu. Mu zola kuzwa Mpeve-Santu.”] Nge ke na nsatu ya kuzwa Yawu. Nge zola kukota na Yinsi kisika bansilulu nionso kele. [“Ee.”]

¹⁶⁰ Mpe ntangu yayi, Mfumu, mwana-bakala yayi kele na simu ya nzadi, yandi ke zinga na simu yina yankaka, mpe Jourdain me fuluka. Mpe ya ke na mutindu ve samu na yandi na kuzabuka kaka kana Nge me zibula nzila mutindu Nge salaka samu na Josué mpe Israel. Mpe, Tata, mu ke lomba Nge, mutindu kisadi ya Nge, bika ti mpangi ya beto ya ntalu, O Nzambi, bika yandi kota na Yinsi yayi ya nsilulu, nsilulu yayi. Ti, na simu yina yankaka, mutindu ba kebaka munu na mpimpa yina, bika mu kuzwa ntangu ya mbote ya kusimba yandi mpe kuyamba yandi, na Yinsi yina yankaka, kutuba, “Mpangi ya munu ya ntalu.” Pesa yawu, Mfumu. Bika yandi kuzwa nsilulu ya Nzambi, Mpeve-Santu. Amen.

¹⁶¹ O Mfumu, samu na yayi, mpangi ya munu ya lemvo; diboko yayi vwandaka na lutondo samu na munu, mpe ya salaka mambu mingi samu na munu, yina ba me zonzaka ve. Yandi ke kwikila mpe yandi ke na lukwikilu. Mpe ntangu yayi mbeni ke na kumeka na kusimba yandi, nkundi ya munu: sukadi. Mpe yandi ke banza ti yandi—yandi lenda baka mwana-bakala yayi. Kasi mu ke landa yandi. Mu ke kwisa, samu na kuvutula yandi na Nge mosi, Mfumu, na kulosaka ditadi yayi na lukwikilu ya kikesa. Na Nkumbu ya Yesu Klisto mu ke bula diabete yina ya sukadi! . . . ? . . . mpangi ya munu ya bakala. Vutula dimeme ya Nge Mosi na lupangu, Tata, na Nkumbu ya Yesu. Amen.

[Mpangi-kento Bell ke tuba na Mpangi Branham—Mu.]

¹⁶² O Mfumu, mpangi ya beto ya kento kuzaba ti yayi kele bunene ya nzutu, mutindu dokotolo me tuba, ya ke kima yina ke kufwa nge. “Na konso kitesilu, kuma nene, vutuka diaka ntwenia,” landila manaka ya assurance. Mpe yandi zola zinga samu na luzitu mpe lukumu ya Nzambi. Mpe ya ke na dokotolo mosi lenda sala yawu, Tata Nzambi. Ya ke kaka na—na diboko ya Nge. Mpe Mpangi-kento Bell vwandaka na kwikama mingi. Mpe yandi vwandaka na lutondo mpe bukebi na bakumekama, yina yandi lutaka. Yandi lutaka na kati ya bakumekama ya nene. Mu me kwisa samu na yandi na nkokila yayi, Mfumu. Mu me kwisa samu na kukutana na mbeni yina kuna. Mu me ludika yawu na kivuvu nionso yina mu lendaka ludika yawu. Na Nkumbu ya

Yesu Klisto mu ke losa ditadi yina ya lukwikilu na mbeni yayi me kanga yandi. Bika ti ya panza yandi, mpe ya nata yandi ntama na yandi, mpe yandi ke vwanda na kiyeka ya kuvutuka diaka na matiti ya mbote mpe bamasa ya lembami, kati na Yesu Klisto. Amen.

Ya ke salama, Mpangi-kento Bell. Kutula ntembe ve.

¹⁶³ Mpangi-kento Spencer. [Mpangi-kento Spencer me tuba, “Mpangi-bakala, Mpangi Bill, mu ke zolaka Mfumu mingi konso kilumbu mu ke zinga. Mpe bamvula makumi zole mu me kuma awa, na kisika yayi. Mpe mu me belukaka mingi na konso kima yina tambulaka mbote ve na munu. Beno nionso ke bambuka yawu, mpe. . . ? . . .”—Mu.] Ya kieleka, mpangi-kento. . . ? . . . [“Mpe Yandi me sakumunaka munu mingi! Mpe mu ke zolaka Yandi mingi, konso kilumbu ya luzingu ya munu. Mu zaba ti mu ke na luzingu ya kitoko kati na Mfumu.”] Mu ke kwikila ti, Mpangi-kento Spencer. [“Mu ke na kiese. Mu ke na kiese! Kana mu ke na Mpeve-Santu ve, mu ke—mu ke vwanda na diziku samu na konso kima yina Yandi ke na yawu samu na munu. Mpe mu ke kufwa na diziku.”] Amen. [“Yawu yina mu zola ti Yandi sala mpe mu ke kufwa na diziku na Yesu.”] Amen. Nzambi sakumuna nge. . . ? . . . Amen. [“Mpe mu ke tuba na nge yina mu zola ti nge sala. Nge zaba, Noé kotaka na dibuta ya yandi nionso, mpe mu zola dibuta ya munu nionso. Nge zaba mu ke zolaka ti bankundi ya munu ya luzolo kuvuluka.”] Mu me bakula. Bana ya nge. Ya ke mbote. [“. . . ? . . . bana ya munu.”] Ee, mama. [“Mpe bakala ya munu.”] Ee, tata, mu. . . [“Mutindu nge zaba yawu nionso.”] Ee. [“Nge sambila samu na beto.”]

¹⁶⁴ Beto nionso me zaba Mpangi-kento Spencer, mpe beto zaba yawu mutindu yandi na Mpangi Jess vwandaka na mpasi, kasi ba vwandaka kwisa kaka na yinzo-Nzambi awa. Ntangu mu ke zabuka na simu yina ya nzadi, ba ke tekita diaka ve mutindu yayi. Ba ke vwanda bantwenia. Oh! Mpangi Jess, kana mu ke. . . ? . . . nge zaba. Na yawu beno nionso kuzaba, kaka—kaka kuna na simu ya mwa. . . ? . . . kuna, nge ke vutuka ntwenia ya kento ya kitoko, mpe Mpangi Jess ke vutuka diaka ntwenia ya bakala. Nzambi sakumuna beno.

¹⁶⁵ Ntangu yayi, beno tala. Mu zola pesa beno kaka mwa dilongi ya fioti mingi, samu beno kele bantu ya nsuka awa, mu zola pesa yawu.

¹⁶⁶ Mpamba ve, mu zaba ti yayi kele mwana ya nge ya bakala, Charlie. Nge zola ti ba sambila yandi? [Mpangi Charlie me tuba, “Ee.”—Mu.]

¹⁶⁷ Mu zola tuba dyambu mosi yayi. Beno me tangaka ntete na Masonuku kisika Biblia me tuba yawu? Paul tubaka na Mfumu ya basoda ya Rome.

Beno ke kuwa munu mbote? [Dibuundu me tuba, “Amen.”—Mu.]

168 Yandi tubaka na Romain yina, ntangu yandi bendaka mbele ya yandi, samu na kukifwa, kuna na Philippien ntangu yandi vwandaka na boloko. Mpe kuningana ya ntoto ningisaka boloko. Yandi tubaka, “Kwikila na Mfumu Yesu Klisto, mpe nge na yinzo ya nge ke vuluka.” Beno me kuwaka yawu ntete? “Nge na yinzo ya nge.” Ntangu yayi, beno tala. Kana beno ke na lukwikilu mingi samu na mpulusu ya beno mosi, beno lenda vwanda na lukwikilu ya mingi ve samu na yinzo ya beno? Nzambi, na mutindu nionso, ke sala yawu.

169 Mpe, Mfumu, mu ke sambila samu na Mpangi-kento Spencer mpe Mpangi-bakala Spencer, na nkokila yayi, ti konso mwana, bawu mpe bana ya bawu, ti bawu nionso kuvwanda na Yinsi yina ya nkembo, ya kiese kisika bimbevo to bununu ke vwanda ve, kiadi ve to mawa, mpe mwa luzingu yayi nionso awa ke kuma ndosi ya yimbi yina me lutaka. Bika bawu kuzwa yayi, mpe ti bana ya yandi nionso, mpe bakala ya yandi, baya yandi nionso ya luzolo, mpe bayina nionso ke zolaka yandi, mpe bayina nionso yandi ke zolaka, bika bawu kuvwanda kuna na yandi, na Nkumbu ya Yesu. Amen.

170 [Mpangi-kento Spencer me tuba, “Amen. Matondo na nge.”—Mu.] Nzambi sakumuna nge. [“Mu ke vwanda na bamvula makumi nana na zole, ntama mingi ve.”] Bamvula makumi nana na zole. [“...?..Kasi ba ke lemba, na bamvula yina. Kasi mu ke sala dyaka bisalu ya munu nionso ya kulamba, kusukula bilele, mpe kuwoma bilele, mpe kusukula yinzo.”] Kaka mutindu yinza ke na kubeba, Mpangi-kento Spencer. [“Yinga, mutindu yina. Mu kele ya kulemba, ntangu nionso. Ba me bakula yawu... Mu yufulaka na mama ya munu, bokilo ya munu ya kento, yina vwandaka na bamvula makumi yivwa, wapi mutindu nge ke tala na yina nge me kuma kiboba, ntangu me luta mingi. Yandi tubaka, ‘Cheri, ntangu yankaka nge ke vwanda ya kulemba ntangu nionso.’ Mu me lemba.”] Mbote, nge me kubama na kukwenda pema, nge me mona. [“Mu me lemba mingi, ntangu nionso. Mu ke na nsatu ya kupema. Mu ke na nsatu ya yawu.”] Inga, mama. [“Mpe mu zola kupema kati na Mfumu, ya kufukama. Yawu yina, yawu yina kaka mu zola.”] Yinga. Tula kaka lukwikilu ya nge kati na Yandi, Mpangi-kento Spencer, mpe nge ke zabuka kuna. [“Mu zola kufwa na diziku, na Nkumbu ya Yesu. Yawu yina mu ke zola kumona, tii kuna Yandi ke bokila.”] Mpe Yandi tubaka... [“Mu ke zola bima nionso Yandi ke na yawu samu na munu.”] Mpe kaka mutindu mu me telema awa mutindu yayi na nge, na nkokila yayi, Mpangi-kento Spencer, na lemvo ya Yandi mu ke mona nge na Jess simu yina kuna, ntwenia ya mavimbi ya mbote. Beno nionso ke kwenda mbangu, na kuboka, “Mpangi ya munu! Mpangi ya munu!” Mu ke mona beno.

Ba-nerf ya yandi.

171 Tata Nzambi, mwana-kento yayi kele na kidi-kidi na yintu

ya yandi, mpe yandi ke na nkisi ve. Ya ke kaka yandi mosi, ya ke sala mpasi. Kasi mu me kwisa samu na yandi na nkokila yayi. Mu me kwisa na Nge, Tata. Mu me kwisa, mu ke lomba na Nge na kuludika munduki yina mu fwana, yina lenda bula. Bikwa yawu vwanda kieleka na kikesa, yawu bula na kati-kati ya mukongo ya yandi. Bikwa kisambu yayi, na Nkumbu ya Yesu Klisto, kubula kimbevo yina ya kidi-kidi mpe kuzenga yawu bitini-bitini, yawu vutula dimeme yayi na kilanga ya Nzambi. Amen.

Ya ke salama mutindu yina, cherie.

¹⁷² [Mpangi-kento mosi me tuba, “Sambila. Mu ke na bana sambanu yina mu ke lomba na Nzambi na kubelusa mpe kuvulusa bawu.”—Mu.]

¹⁷³ Nzambi ya Zulu, pesa yandi, bana ya yandi sambanu yina yandi zola ti bawu kuvuluka. Yandi kuwaka kimbangi yina ya Mpangi Daulton, bana ya yandi ya kitoko. Yandi ke na nsatu ya bana ya yandi sambanu, Tata. Bikwa yandi kuzwa bawu. Bikwa bawu kutana na yandi na Yinsi yina kisika mpimpa kele ve, na lukengolo ya kieleka mpe ya kubumbama na Menga ya Yesu Klisto. Amen.

Bikwa ti nge kuzwa bawu, mpangi-kento, ya ke kisambu ya munu.

[Mpangi-kento mosi ke na kutuba na Mpangi Branham—Mu.]

¹⁷⁴ Mu me kwikila nge. Ya ke na kima ve, kieleka, lenda sadisa yawu. Ba me pesa bawu mwa bima yina me monana mutindu, oh, kima mosi mutindu acetamine. Ya ke cortisone, ba ke bokilaka yawu. Ti, yina ke kufwa nge, na kutala. Ya ke panzaka menga ya nge. Kasi, tala. Tala, arthrite kele mutindu nkosi yina me kanga dimeme mpe me tina ntama. Ntangu yayi, yinki lanse ke sala? Oh, la la! Ya ke na nkosi mosi ya nene, yina ke na kuboka na mwana-dimeme. Mpe yandi ke zolaka mwana-dimeme, na yawu yandi me tina na mwana-dimeme. Kasi David bakaka lanse mpe yandi landaka yandi. Beno me mona? Beno tala ntangu yayi. Yandi vwandaka na matadi tanu: l-u-k-w-i-k-i-l-u, yandi mosi, n-a. Lanse ya yandi vwandaka na diboko *yayi*: Y-e-s-u. Yandi me kufwa na munduki. Kima mosi fwanaka salama. Beto landa arthrite yina, na nkokila yayi, na nzila ya kisambu. Bikwa Nzambi kupesa yawu na nge.

¹⁷⁵ [Mpangi-kento ke na kutuba na Mpangi Branham—Mu.] Yandi zola ti ba botika yandi na Nkumbu? [“Ve. Ve. Yandi me tuba mutindu yina ve.”] Nge zola ti ba botika yandi. [“Mu zola ti ba botika yandi.”] Matondo na nge, mpangi-kento. Ya kele ve samu ti ya ke mutindu yina. Ya ke samu. . . Ntangu yayi, kana ya vwandaka na kati ya Biblia, samu, “Tata, Mwana, mpe Mpeve-Santu,” Mu—mu ke kwikila yawu, mu ke bikala kaka na yawu, mpangi-kento. Mu—mu lendaka zola kuvwanda luswaswanu. Mu—mu ke zola vwanda mutindu mosi. Mu lendaka bika ve. . .

Mu—mu ke pesa mvutu ve samu na yawu, beno me mona. Mpe mu ke tuba yawu kaka mutindu *Yandi* me tuba yawu; samu na kuvwanda ya luswaswanu ve, kasi samu na kuvwanda ya kusungama.

¹⁷⁶ Ntangu yayi, Tata, beto me kwisa samu na baya yandi ya luzolo yina ke na arthritis, mpe yandi zola ti ba botika yandi na Nkumbu ya Mfumu Yesu, samu yina kele nkotolo. Yawu yina mwelo ya kuzibuka. Ya ke kisika yina Josué zibulaka nzila yina kotisaka bawu na yinsi ya nsilulu. Ya vwandaka na bisika zole ve to bisika tatu; ya vwandaka kaka na mosi.

¹⁷⁷ Pierre, na Kilumbu ya Pantekote, ntangu ba fungulaka Dibuundu ya ntete, ba zibulaka nzila, yandi tubaka, “Beno balula bantima ya beno mpe beno baka mbotika na Nkumbu ya Yesu Klisto.” bawu sobaka ata fioti ve nzila yina, bawu nionso kotaka na Yinsi ya nsilulu.

¹⁷⁸ Bayankaka na kati ya bawu vwandaka meka na kuzabuka, kuna na kisika yankaka ya kuzabuka, mpe Paul tubaka na bawu, “Na wapi mutindu beno kuzwaka mbotika ya beno? Beno ke na kumeka na kuzabuka?”

Mpe bawu tubaka, “Awa na nsi kisika Jean talaka.”

¹⁷⁹ Yandi tubaka, “Mbote, Jean talisaka bantu kaka na ntangu, mpe kisika.” Na yawu ntangu bawu kuwaka yayi, ba botikaka bawu kisika ya mbote ya kuzabuka. Bawu zabukaka, mpe bawu kuzwaka vinu ya Mpeve-Santu.

¹⁸⁰ Pesa yawu na mpangi ya beto ya kento mpe bankundi ya yandi ya luzolo, na Nkumbu ya Yesu Klisto. Amen.

¹⁸¹ Mpangi Lyle. [Mpangi Lyle me tuba, “Mu ke kwikila ti nge ke mfumu ya kieleka, Mpangi Branham.”—Mu.] Oh, mpangi-bakala! [“Kwendaka kuna. . .? . . .Nge ke bambuka moyo kana ya vwandaka na ndosi, kima mosi kwisaka. . .? . . .Kana nge tuba ndosi yango, ya ke vwanda mbote mingi. Ya kele yina mu kuzwaka. Na yina, nge ke lotaka bandosi ya mbote ntangu nionso! . . .? . . .”] Yinga. Ya ke na mwa ntangu fioti. [“Yinga.”] Yinga. Mu ke na kiese. . .? . . .Nzambi sakumuna nge. Nge ke na kukwenda na Yinsi ya nsilulu ntangu yayi! Mbala yankaka mu ke tuba yawu.

¹⁸² Bantu yikwa ke bambuka moyo kaka na ntwala ministere yayi kusiamisama na munu, mpe mu vwandaka loba na bakala mosi, kuna na nzadi, na dyanga? Mpe mu vwandaka kanga mwa bambisi ya fioti, mpe Mpeve-Santu kulumukaka na zulu ya munu. Ya vwandaka. . .Muntu yayi kele Mbangi ya Yehowa, yandi vwandaka. Mpangi ya yandi kele awa kisika mosi kuna, Banks Wood. Yandi ke na kati awa kisika mosi kuna, yina kele nkalani ya munu.

¹⁸³ Yayi kele Lyle. Mpe bantu yayi vwandaka Bambangi ya Yehowa. Mpe bawu tubaka, kilumbu mosi ntangu beto

vwandaka loba kuna, na manima mwana-bakala yayi kundimaka, Mu tubaka na yandi ti ya vwandaka na kima mosi na luzingu ya yandi, mpe yina—yina salamaka, mpe nionso yina me tala yawu. Na yina, yandi me tuba na munu kaka na ntangu yayi, mpe yandi me basisa yawu kaka na ntangu yayi na luzingu ya yandi, ya kele mbote, ya vwanda konso kima yina. Ya kele mbote mingi. Tata ya yandi vwandaka mutangi. Tata yango kele awa na nkokila yayi, Billy? [Muntu mosi me tuba, “Kuzaba ve.”—Mu.] Mpe yandi na kento ya yandi, bawu zole, ba botikaka bawu, samu na kuvwanda bimbangi na Nkumbu ya Yesu Klisto, awa na kati ya baptistère. Mpe bakala yayi vwandaka pene-pene ya munu, kilumbu mosi.

¹⁸⁴ Banks, wapi kisika nge kele? Yandi kele awa na nkokila yayi? [Muntu mosi me tuba, “Kuna na manima na nsongi.”—Mu.] Kuna na manima na nsongi. Yinga.

¹⁸⁵ Mpe beto vwandaka loba. Mpe, mpangi-bakala, mwana ya munu ya bakala ya fioti kufwaka. . . Mu banza yandi kufwaka mwana ya niawu, mwa bilumbu fioti na ntwala. Mwa mama yina ya niawu vwandaka na nkonga bana ya niawu, mpe yandi lokutaka yawu mpe yandi losaka yawu na ntoto. Mu banzaka. . . Mu tubaka, “Mfumu ke vutula yawu na luzingu,” kilumbu mosi na ntwala. Ya kele kieleka, Lyle? [Mpangi Lyle Wood me tuba, “Yinga.”—Mu.] Yandi vwandaka kuna na crique. Mpe mu tubaka, “Ya kele MUTINDU ME TUBA MFUMU.” Mpe beto lobaka mpimpa ya muvimba mpe beto kangaka kima mosi ve.

¹⁸⁶ Na suka yina landaka, beto vwandaka loba, kuna na kati ya crique, samu na mwa ba-poisson-lune. Ya ke bambisi ya fioti. Mpe Mpangi Lyle kangaka perche mosi ya nene, mpe yandi bikaka mwa poisson-lune kumina yawu, ya vwandaka na ndobo ya nene, tii, ntangu yandi basisaka yawu, mwa nsinga yango vwandaka kaka na nsi, ndobo ya nene, na kati ya kivumu ya mwa poisson-lune. Mpe ntangu yandi basisaka yawu, yandi bendaka kaka misobo mpe bima yankaka nionso ya mwa poisson-lune, samu na kubaka yawu. Mpe yandi bendaka yawu nionso na nganda, samu ndobo yina ya nene kotaka na kati ya kivumu ya mbisi. Mpe ntangu yandi salaka mutindu yina, yandi losaka yawu na zulu ya masa. Mpe yandi ninganaka malembe, mbala yiya to tanu, mpe yimeni, samu misobo ya yandi mpe ba-branchie ya yandi vwandaka na ngaanda ya yinwa ya yandi. Mpe yandi vwandaka kuna na zulu ya masa pene ya ngunga mosi, ya vwandaka kuna na kati ya matiti.

¹⁸⁷ Mpe mu vwandaka kuna, na kuloba. Mpe na mbala mosi, Mpeve-santu kwisaka, tubaka, “Tuba na mbisi yina.”

¹⁸⁸ Mu tubaka, “Mwa mbisi ya fioti, Yesu Klisto me pesa nge diaka luzingu ya nge.” Mpe mwa mbisi yina, vwandaka ya kufwa na zulu ya masa, yandi balukaka, mpe kwendaka rrrrruut, kuna na kati ya masa, yandi kwendaka na mbangu nionso.

189 Mpangi Lyle na Mpangi Wood vwandaka kuna. Mpangi ya bakala Lyle tubaka, “Mpangi Branham, yina zola tuba samu na munu, samu mu vwandaka me tuba na mwa . . .”

190 Na nkokila yayi, mu lenda tuba na bawu yina nge tubaka? [Mpangi ya bakala Lyle Wood me tuba, “Nge lenda sala yawu. Ya ke mbote mingi, Mpangi Branham.”—Mu.]

191 Yandi tubaka, ntangu yandi bendaka misobo ya yawu na nganda, yandi losaka yandi kuna na nganda, yandi tubaka, “Nge me manisa nionso, nkundi ya munu,” mutindu yina kaka. Yandi losaka yawu na nganda.

Yandi tubaka, “Ya—ya vwandaka samu na munu.”

Mpe mu tubaka, “Ve, Mpangi Lyle. Ya vwandaka yawu ve.”

192 Mpangi Banks na manima kuna, me tuba, “Bantu yikwa na yinza yayi, bantu mafunda yikwa, ke zola kutelema kisika beto me telema ntangu yayi, samu na kumona ngolo ya Nzambi ke kulumuka mpe kusiamisa kima ya mutindu yina!” Na mutindu yankaka, yandi zolaka . . .

193 Mu ke kwikila ti beto nionso me kuwa mutindu Pierre salaka, “Ya ke mbote na kuvwanda awa. Beto tunga ba-tabernacle tatu.” Beno me mona? Ya ke mbote.

194 Ntangu yayi, Mpangi Lyle, nge kele ya kukusa na Mpeve-Santu ntangu yayi. Nge me basika na Egypte. Banzungu ya ayi na bima ya mvindu ya yinza me bikala na manima ya nge. Nge me telema na kumu ya Jourdain ntangu yayi, kuna na simu. Bika Nzambi kunata nge kuna; Lyle.

195 Nzambi ya Ngolo nionso, yayi kele trophée ya Nge. Yandi vwandaka kieleka na kati ya mpasi, Mfumu, kasi ntima ya munu me kwenda samu na yandi. Bisambu ya beto me bangisa yandi ngolo kuna, mpe kima yina kangaka yandi me kwenda ntama ya yandi. Ya me vwanda ya kubeba. Mpe ntangu yayi ya ke na kukwenda na Jourdain. Nata yandi na Yinsi ya nsilulu, Mfumu. Mpe tula yandi kidimbu na kati ya bantu. Ti, na Kilumbu yina ya nkembo ntangu beto ke kutana kuna, bika munu kuwa kuyamba ya maboko ya yandi, na kubokaka, “Mpangi ya munu ya ntalu!” “Mu zaba Yandi.” Nata Banks kintwadi na yandi, Mfumu, Nge ke sala yawu? Papa na mama, mpe bawu nionso, mpangi-kento, mpe dibuta yina nionso ya nene yayi, bika ti beto nionso kukutana kuna, Mfumu, mpe bawu nionso kufuluka na Mpeve-Santu. Mu ke sambila na Nkumbu ya Yesu. Amen. [“Amen.”]

Nge ke kuzwa Yawu, mpangi-bakala. Nzambi sakumuna nge, Mpangi Lyle.

196 [Muntu mosi me tuba, “Mpangi-bakala?”—Mu.] Yinga, mpangi-bakala. [“Ba ke na kubokila na allo-allo katuka ntama, mpe muntu ke na kufwa, yandi ke na kuingila na nsinga ya allo-allo.”]

197 Muntu mosi ke na kufwa, ba ke bokila na alo-alo katuka ntama. Mu ke bika kisalu na Mpangi Neville na ntangu mu ke kuma kuna.

198 [Mpangi Neville me tuba, “Kilumbu mosi ya nene mpe ya kitoko kati na Mfumu! Nzambi me sala mambu ya kitoko samu na beto bubu yayi. Balombilu ya munu me kubaka kieleka mvutu—Mu.]

[“Beto nionso, kutelema.]

199 [“Na yawu beno bambuka moyo, lukutakanu ya Kilumbu ya tatu na nkokila. Beno sambila mingi. Bantima nionso kele na mawa, yina kele na keti-keti kuvwanda kieleka na ngwisani na Nzambi. ‘Ntangu me kuma pene-pene. Ntangu me lunga. Bubu yayi kele kilumbu ya mpulusu.’]

200 [“Nzambi kusakumuna beno mpe banzenza nionso, beno yina me katuka ntama. Kisambu ya beto kele ti Nzambi ke pesa beno lemvo na nzietelo, ntangu beno ke vutuka na bisika beno ke zingaka. Ya ke mbote na kuvwanda kintwadi na beto. Mpe beno sambila samu na beto na ntangu beno ke kwenda, ti Mfumu ke sakumuna kisika yayi, mpe.]

201 [“Tata ya beto ya Mazulu, mutindu kisadi ya Nge me kwisa na nkokila yayi, samu na kusala kisalu ya kisadi ya Nge mpe profete, mu me telema na kati, na kati-kati, samu na kusala lupangu mosi, ya me kwisa na beto na nsatu ya nene yina ke pela ya kisadi ya Nge, yina me botama na Mpeve-Santu, mpe me pesa kisalu ya profete, samu na kutuba na mbandu yayi. Sadisa beto bubu yayi mpe na nkokila yayi, samu na kundima Nsangu yina me kwisa na beto, Mfumu, samu na kukindisa beto, na kukubama.]

202 [“Sakumuna muntu nionso yina ke kwenda na bielo ya yinzo yayi na nkokila yayi. Bika ti bimbevo yina kele na zulu ya beto, yina beto me zaba ve, bika lemvo ya Nge ya lusakumunu mpe ngolo kukeba mpe kutanina mpe kubelusa beto, mpe kubumba beto, tii na ntangu yina Nge ke kubama na kunata beto na simu yina. Sakumuna bantu yina me suka ntima mpe bantu yina kele na mawa, bantu yina kele na boma, mpe bayina me lembe.]

203 [“Nzambi, beto ke sambila na nkokila yayi samu na kumonana ya luswaswanu, lusakumunu ya Mpeve-Santu, kuvwanda na zulu ya konso muntu ya nzietelo, konso kizieti, konso nzenza na kati ya mielo ya beto. Konso muntu yina ke basika na kielo yayi na nkokila yayi, bika ti vwale yina ya ke fikaka ya Menga, ya kulunsi ya Calvaire, kufika mbote-mbote mpe kulungisa bansatu nionso.]

204 [“Belusa beto ntangu beto ke na kimbevo. Bumba beto na ngolo ya Nge ya nene. Kusa beto samu na lukutakanu. Bika beto tambula kati na zola, na ntwla ya Nge, bilumbu nionso ya luzingu ya beto. Mpe beto ke kumisa Nge samu na yawu, samu

beto me lomba yawu na Nkumbu ya Yesu Klisto mpe samu na zola ya Yandi. Amen.]

²⁰⁵ ["Mpe Nzambi kusakumuna beno. Mpe beto ke na kiese na kuvwanda na beno kintwadi. Beno pesana mbote mosi na yankaka."—Mu.]


²⁰⁶ Mu me sepela mingi samu na nionso yina beno me sala samu na munu, kalati na...?...Yinga, tata. Mu me sepela mingi...?...

²⁰⁷ Na yawu beto me tinda ditadi ya lukwikilu...?...Ya vwandaka na muntu mosi awa...?...Na yawu mu me tinda kisambu na manima ya yandi, na Nkumbu ya Yesu Klisto. Ya me vwanda kuna ngunga mosi, ata kutambula ya menga ve, ata mpema ve, kima mosi ve. Ata mpema ve, ata kutambula ya menga ve, to kupema, kima mosi ve; meso kotaka na kati ya yintu ya yandi, ya vwandaka ya kukulumusa na chaire. [Mpangi Neville me tuba, "Ya me bika yandi ya kulala kuna tii na ntangu kisambu yina kwisaka."]

²⁰⁸ *Yayi* kele dyaka ya kufungula? [Mpangi Neville me tuba, "Yinga, ya kele dyaka ya kufungula."—Mu.]

²⁰⁹ Mu lenda kuzwa bukebi ya beno? Na zulu kuna, mupanzi nsangu mosi ya ntwenia, longi mosi, na zulu awa na Indiana, vwandaka longa, yandi kubwaka mpe yandi kufwaka na chaire, pene ya ngunga mosi me luta. Ntangu yandi vwandaka longa, yandi kubwaka na ntwala, mpe yandi kufwaka na chaire, mupanzi nsangu mosi me zabana mingi, vwandaka longa awa na Indiana. Pasteur kwisaka mpe bokilaka munu. Yandi kufwaka na ntangu yandi vwandaka longa na nsi ya kukusa ya Mpeve, yandi kubwaka na ntwala, meso ya yandi balukaka, yandi vwandaka pema diaka ve. Ba zabisaka ti yandi me kufwa, yandi kufwaka katuka ngunga mosi. Mpe kima mosi tubaka na bawu na kubokila dibuundu samu munu sambila. Na yawu mu me tinda kisambu ya munu samu na kuvutula yandi, na Nkumbu ya Mfumu Yesu. Bika beno vukana na munu na lukwikilu, ti yawu luta na lweka ve; yawu kupesa yandi madidi mpe ya vutula yandi. Matondo.

²¹⁰ Nzambi kuvwanda na beno, tii kuna mu ke mona beno na Kilumbu ya tatu na nkokila. Beno bantu ya Georgie mpe bantu ya bisika, beno kwenda mbote. Nzambi kuvwanda na beno.

²¹¹ Mpangi Pat...?... 

60-0515E Lukumu Ya Bana #1
Branham Tabernacle
Jeffersonville, Indiana U.S.A.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org